

欽定南史

卷一

七三

南  
王  
五  
八

十  
六

光緒癸卯冬十月  
五洲同文局石印

欽定四庫全書總目提要

南史八十卷

唐李延壽撰延壽事蹟附載新唐書令狐德棻傳延壽承其父大師之志為北史南史而南史先成就正於令狐德棻其乖失者嘗為改定宋人稱延壽之書刪煩補闕為近世佳史顧炎武日知錄又摘其孝安民諸傳一事兩見為紀載之疎以今考之本紀刪其連綴諸臣事蹟列傳則多刪詞賦意存簡要殊勝本書然宋齊梁陳四朝九錫之文符命之說告天之詞皆沿襲虛言無關實證而備書

簡牘陳陳相因是芟削未盡也且合累朝之書勒為通史發凡起例宜歸畫一今延壽於循吏儒林隱逸傳既遞載四朝人物而文學一傳乃因宋書不立此目遂始於齊之邱靈鞠豈宋無文學乎孝義傳搜綴湮落以備闕文而蕭矯妻羊氏衛敬瑜妻王氏先後互載男女無別將謂史不當有列女傳乎況北史謂周書無文苑傳遂取列傳中之庾信王褒入於文苑則宋之謝靈運顏延之何承天裴松之諸人何難移冠文苑之前北史謂魏隋有列女傳齊周並無此篇今又得趙氏陳氏附備列

女則宛陵女子等十四人何難取補列女之闕書  
成一手而例出兩歧尤以矛陷盾萬萬無以自解  
者矣蓋延壽當日專致力於北史南史不過因其  
舊文排纂刪潤故其減字節句每失本意間有所  
增益又緣飾為多如宋路太后傳較宋書為詳然  
沈約修史工於詆毀前朝而不載路太后飲酒置  
毒之事當亦揆以前後恩慈不應存此異說也延  
壽採雜史為實錄又豈可盡信哉然自宋略齊春  
秋梁典諸書盡亡其備宋齊梁陳四史之參校者  
獨賴此書之存則亦何可盡廢也

翰林院檢討臣孫廷翰恭錄

南史目錄

唐

李

延

壽

撰

本紀十卷

列傳七十卷

凡八十卷

本紀

南史卷一

宋本紀上第一

武帝

諱裕  
姓劉氏

少帝

諱義符

南史卷二

宋本紀中第二



文帝

諱義隆

孝武帝

諱駿

前廢帝

諱子業

南史卷三

宋本紀下第三

明帝

諱彧

後廢帝

諱昱

順帝

諱準

南史卷四

齊本紀上第四

高帝

諱道成  
姓蕭氏

武帝

諱曠

南史卷五

齊本紀下第五

廢帝鬱林王

諱昭業

廢帝海陵王

諱昭文

明帝

諱鸞

廢帝東昏侯

諱寶卷

和帝

諱寶融

南史卷六

梁本紀上第六

武帝上

諱衍  
姓蕭氏

南史卷七

梁本紀中第七

武帝下

南史卷八

梁本紀下第八

簡文帝

諱綱

元帝

諱繹

敬帝

諱方智

南史卷九

陳本紀上第九

武帝

諱霸先  
姓陳氏

文帝

諱憺

廢帝

諱伯宗

南史卷十

陳本紀下第十

宣帝

諱頊

後主

諱叔寶

列傳

南史卷十一

列傳第一

后妃上

宋孝穆趙皇后

孝懿蕭皇后

武敬臧皇后

武張夫人

文章胡太后

少帝司馬皇后

文元袁皇后

潘淑妃

孝武昭路太后

明宣沈太后

孝武文穆王皇后

宣貴妃

前廢帝何皇后

明恭王皇后

後廢帝陳太妃

後廢帝江皇后

順陳太妃

順謝皇后

齊宣孝陳皇后

高昭劉皇后

武穆裴皇后

文安王皇后

鬱林王何妃

海陵王王妃

明敬劉皇后

東昏褚皇后

和王皇后

南史卷十二

列傳第二

后妃下

梁文獻張皇后

武德禰皇后

武丁貴嬪

武阮脩容

簡文王皇后

元徐妃

敬夏太后

敬王皇后

陳武宣章皇后

文沈皇后

廢帝王皇后

宣柳皇后

後主沈皇后

張貴妃

南史卷十三

列傳第三

宋宗室及諸王

長沙景王道憐

臨川烈武王道規

鮑照

營浦侯遵考

從子季連

武帝諸子

廬陵孝獻王義真

彭城王義康

江夏文獻王義恭

南郡王義宣

衡陽文王義季

南史卷十四

列傳第四

文帝諸子

元凶劭

始興王濬

南平穆王鑠

竟陵王誕

建平宣簡王宏

廬陵王禕

晉熙王昶

武昌王渾

始安王休仁

晉平刺王休祐

海陵王休茂

鄱陽哀王休業

臨慶沖王休倩

新野懷王夷父

桂楊王休範

巴陵哀王休若

孝武諸子

豫章王子尚

晉安王子勛



松滋侯子房

臨海王子頊

始平孝敬王子鸞

永嘉王子仁

始安王子真

邵陵王子元

齊敬王子羽

淮南王子孟

晉陵孝王子雲

南海哀王子師

淮陽思王子霄

東平王子嗣

武陵王贊

明帝諸子

邵陵殤王友

隨賜王勰

新興王嵩

始建王禧

南史卷十五

列傳第五

劉穆之

曾孫祥  
從子秀之

徐美之

從孫湛之  
孝嗣孫君禕

湛之孫孝嗣

傅亮

族兄隆

檀道濟

兄韶  
韶弟祗

韶孫珪

南史卷十六

列傳第六

王鎮惡

朱齡石

弟超石

毛脩之

孫惠素

傅弘之

朱脩之

王玄謨

子瞻  
玄載

從弟玄象  
玄邈

南史卷十七

列傳第七

劉敬宣

劉懷肅 弟懷敬 懷慎

劉粹 族弟損

孫處

蒯恩

向靖 子柳

劉鍾

虞丘進

孟懷玉 弟龍符

胡藩

劉康祖 伯父簡之簡之子道產簡之弟謙之道產子延孫

南史卷十八

列傳第八

趙倫之 子伯符

蕭思話 子惠開 惠明

惠明弟惠基 惠基子洽 惠基弟惠休

惠休弟子介 介子允 引 惠開從子琛

臧燾

立孫嚴 嚴族叔未甄 未甄子盾

厥 燾弟熹 熹子質

南史卷十九

列傳第九

謝晦

兄瞻 弟囑 從叔澹

謝裕

子恂 立孫徵 裕弟純 述

述孫朧

謝方明 子惠連

謝靈運

孫超宗 曾孫幾卿

南史卷二十

列傳第十

謝弘微

子莊

孫臧

曾孫護

玄孫哲

臧弟顥

顥弟瀟

瀟子覽

覽弟舉

舉子翬

舉兄子儁

南史卷二十一

列傳第十一

王弘

子錫

錫弟僧達

曾孫融

弘弟子微

微兄遠

遠子僧祐

僧祐子籍

弘從孫瞻

弘玄孫沖

沖子瑒

瑜

南史卷二十二

列傳第十二

王曇首

子僧綽

孫儉

曾孫騫

騫子規

騫弟暕

暕子承

訓

僧綽弟僧虔

僧虔子慈

慈子泰

慈弟志

志弟子筠

志弟彬

寂

南史卷二十三

列傳第十三

王誕

兄子偃 偃子藻  
藻弟子瑩 瑩從弟亮

王華

從弟琨

王惠

從弟球

王彧

子絢 絢弟績 績孫克 彧兄子蘊  
與弟份 份孫銓 錫 僉通

勸 質 固

南史卷二十四

列傳第十四

王裕之

孫秀之 延之 阮韜  
延之子綸之 曾孫峻

峻子琮

王鎮之

弟弘之 弘之孫晏  
晏從弟思遠

王韶之

王悅之

王准之

曾孫清 清子猛  
從弟逸之 珪之

族子素

南史卷二十五

列傳第十五

王懿

到彥之

孫搗 搗子沆 沆從兄漑  
漑弟洽 洽子仲舉

垣護之

弟子崇祖 崇祖從兄榮祖  
榮祖從父閎 閎弟子曇深

張興世

子欣泰

南史卷二十六

列傳第十六

袁湛

弟豹 豹子象 象從弟昂 馬仙理 顓從弟粲

昂子君正 君正子樞 憲 君正弟敬 泌

南史卷二十七

列傳第十七

孔靖

孫秀之 秀之曾孫奐

孔琳之

孫觀

殷景仁

從祖弟淳

南史卷二十八

列傳第十八

褚裕之

弟淡之 玄孫球 裕之兄子湛之 湛之子彥回 彥回子貴 綦綦子向

向子翔 彥回弟澄 從弟炤 炫子灑 灑子蒙 蒙子玠 炫



南史卷二十九

列傳第十九

蔡廓

子興宗  
約弟搏

孫約  
曾孫凝

南史卷三十

列傳第二十

何尚之

子偃  
黠弟盾

孫戢  
盾從弟炯

偃弟子求  
尚之弟子昌寓

求弟黠  
昌寓

昌寓子敬容

南史卷三十一

列傳第二十一

張裕

子永  
永子瓌

岱  
瓌子率

岱兄子緒  
率弟盾

緒子完  
瓌弟稷

完  
稷

稷從子種

南史卷三十二

列傳第二十二

張邵

子敷 孫冲 融弟寶積

徐文伯 兄子暢

暢子融 文伯從弟嗣伯

南史卷三十三

列傳第二十三

范泰

子畢

荀伯子

族子萬秋

徐廣

郗紹 廣兄子諮

鄭鮮之

裴松之

孫昭明 曾孫子野

何承天

曾孫遜

南史卷三十四

列傳第二十四

顏延之

子竣從子師伯

沈懷文

子冲從兄曇慶

周朗

族孫顥弘讓

顥子捨弘直

捨弟子弘正

確

南史卷三十五

列傳第二十五

劉湛

庾悅

族弟登之仲文子弘遠

登之弟仲文仲文族孫仲容

顧琛

顧覲之

孫憲之

南史卷三十六

列傳第二十六

羊欣

羊立保

子戎子希

沈演之

子勃 兄孫顗 演之從子憲

憲孫浚

江夷

子湛 曾孫敦 五世孫經

六世孫摠 立孫蒨

夷弟子智深 祿

江秉之

孫謚

南史卷三十七

列傳第二十七

沈慶之

孫昭略 從子攸之

子文季

弟子文秀 攸之從孫僧昭

宗慤

從子夫

南史卷三十八

列傳第二十八

柳元景

元景弟子世隆  
儻子偃

儻子盼

世隆子儻  
儻弟愷

儻弟儻

世隆從弟慶遠

敬禮

慶遠子津

南史卷三十九

列傳第二十九

殷孝祖

族子琰

劉勔

子俊  
俊弟繪

孫孺  
繪子孝綽

遵

俊弟子苞  
孝綽子諒

孝綽弟潛

繪弟瑱

南史卷四十

列傳第三十

魯爽

薛安都

從子深

鄧琬

宗越

吳喜

黃回

南史卷四十一

列傳第三十一

齊宗室

衡陽元王道度

繼子 鈞

始安貞王道生

始安王遙光

曲江公遙欣

子 幾

安陸昭王綽

新吳侯景先

南豐伯赤斧

子 穎 曹 穎 達

衡陽公謙

臨汝侯坦之

南史卷四十二

列傳第三十二

齊高帝諸子上

豫章文獻王嶷

子子廉 子恪 子操 子範  
子範 子乾 子範 子顯 子雲

南史卷四十三

列傳第三十三

齊高帝諸子下

臨川獻王映

長沙威王晃

武陵昭王暉

安成恭王暕

鄱陽王鏘

桂陽王鏐

始興簡王鑑

江夏王鋒

南平王銳

宜都王鏗

晉熙王鈇

河東王鉉

南史卷四十四

列傳第三十四

齊武帝諸子

文惠太子長懋

竟陵文宣王子良

子昭曹

廬陵王子卿

魚復侯子響

安敬王子敬

晉安王子懋



南郡王子隆

建安王子真

西陽王子明

南海王子罕

巴陵王子倫

邵陵王子貞

臨賀王子岳

西陽王子文

衡陽王子峻

南康王子琳

湘東王子建

南郡王子夏

文惠諸子

巴陵王昭秀

桂陽王昭粲

明帝諸子

巴陵隱王寶義

江夏王寶立

廬陵王寶源

鄱陽王寶寅

邵陵王寶脩

晉熙王寶嵩

桂陽王寶貞

南史卷四十五

列傳第三十五

王敬則

陳顯達

張敬兒

崔慧景

南史卷四十六

列傳第三十六

李安人

子元履

戴僧靜

桓康

焦度

曹武

子世宗

呂安國

周山圖

周盤龍

子奉叔

王廣之

子珍國  
張齊

南史卷四十七

列傳第三十七

荀伯玉

崔祖思

祖思叔父景真  
宗人文仲

景真子元祖

蘇侃

虞棕

胡諧之

范栢年

虞玩之

劉休

江祐

南史卷四十八

列傳第三十八

陸澄

陸慧曉

子僊 孫繕 兄子閑 閑子絳 絳弟厥 厥弟襄 襄兄子雲公

雲公子瓊 瓊子從典 瓊從弟琰 琰弟瑜 瑜從兄玠 從弟琛

陸杲

子罩

南史卷四十九

列傳第三十九

庾杲之

叔父華

王謙

從叔摛

何憲

孔過

孔珪

劉懷珍

子靈哲 懷慰子霽

從父弟峻 杏 歌

劉沼 從子懷慰 懷珍從孫詩

懷珍族弟善明

南史卷五十

列傳第四十

劉瓛

弟璉 族子顯 顯從弟鼓

明僧紹

子山賓

庾易

子黠 婁 於陵 肩吾

劉虬

子之遴 之亨 虬從弟坦

南史卷五十一

列傳第四十一

梁宗室上

吳平侯景

子顯弟昌

勸

昂

昱

勳

勃

長沙宣武王懿

子業

孫孝儼

業弟藻

猷弟朗

明

猷

永陽昭王敷

衡陽宣王暢

桂陽簡王融

子象

象子造

臨川靜惠王宏

宏子正仁

正義

正德

正德

正則

正德子見理

正則弟正立

正立弟正表

正信

正立子賁

南史卷五十二

列傳第四十二

梁宗室下

安成康王秀

秀子機

機弟推

南康元襄王偉

偉子恪  
恭子靜

恪弟恭  
恭弟祇

範弟諮

鄱陽忠烈王恢

恢子範  
諮弟脩

範子嗣  
脩弟泰

始興忠武王憺

憺子亮  
映弟暉

亮弟映

南史卷五十三

列傳第四十三

梁武帝諸子

昭明太子統

豫章王綜

南康簡王績

廬陵茂王績

邵陵攜王綸

武陵王紀

南史卷五十四

列傳第四十四

梁簡文帝諸子

哀太子大器

尋陽王大心

臨川王大欸

南海王大臨

南郡王大連

安陸王大春

桂陽王大成

汝南王大封

瀏陽公大雅

新興王大莊

西陽王大鈞

武寧王大威

皇子大訓

建平王大球

義安王大昕

綏建王大摯



樂良王大圖

元帝諸子

忠烈世子方等

貞惠世子方諸

愍懷太子方矩

始安王方略

南史卷五十五

列傳第四十五

王茂

曹景宗

席闡文

夏侯詳

子亶  
魚弘

夔

吉士瞻

蔡道恭

楊公則

鄧元起

羅研  
李膺

張惠紹

子登

馮道根

康絢

昌義之

南史卷五十六

列傳第四十六

張弘策

子緬

續

庾域

子子輿

鄭紹叔

呂僧珍

樂藹

子法才

南史卷五十七

列傳第四十七

沈約

子旋

孫衆

范雲

從兄續

南史卷五十八

列傳第四十八

韋叡

兄纂 正子戴

關

鼎

叡子放

正弟稜

孫粲

放弟正

裴邃

邃子之禮 之平子忌

兄子之高

之高弟之橫

之高弟之平

南史卷五十九

列傳第四十九

江淹

任昉

王僧孺

南史卷六十

列傳第五十

范岫

傅昭

弟暉

孔休源

江革

子德藻

徐勉

許懋

子亨

殷鈞

宗人芸

南史卷六十一

列傳第五十一

陳伯之

陳慶之

子昕 暄

蘭欽

南史卷六十二

列傳第五十二

賀瑒

子革  
弟子琛

司馬攸

朱异

顧協

徐摛

子陵  
儀陵子儉  
弟孝克

份

鮑泉

鮑行卿  
行卿弟客卿

南史卷六十三

列傳第五十三

王神念

子僧辯

羊侃

子球  
鴟

羊鴟仁

南史卷六十四

列傳第五十四

江子一

胡僧祐

徐文盛

陰子春

子鏗

杜崩

兄岸 弟幼安  
兄子龕

王琳

張彪

南史卷六十五

列傳第五十五

陳宗室諸王

永脩侯擬

遂興侯詳

宜黃侯慧紀

衡陽獻王昌

子伯信

南康愍王曇朗

子方泰 方慶

文帝諸子

始興王伯茂

鄱陽王伯山

新安王伯固

晉安王伯恭

廬陵王伯仁

江夏王伯義

武陵王伯禮

永陽王伯智

桂陽王伯謀

宣帝諸子

始興王叔陵

豫章王叔英

長沙王叔堅

建安王叔卿

宜都王叔明

河東王叔獻

新蔡王叔齊

晉熙王叔文

淮南王叔彪

始興王叔重

尋陽王叔儼

岳陽王叔慎

義陽王叔達

巴山王叔雄

武昌王叔虞

湘東王叔平

臨賀王叔敖

陽山王叔宣

西陽王叔穆

南安王叔儉

南郡王叔澄

沅陵王叔興

岳山王叔韶

新興王叔純

巴東王叔謨

臨海王叔顯



新會王叔坦

新寧王叔隆

新昌王叔榮

太原王叔匡

後主諸子

太子深

吳興王胤

南平王嶷

永嘉王彥

南海王虔

信義王祗

邵陵王兢

會稽王莊

東陽王恮

吳郡王藩

錢塘王恬

南史卷六十六

列傳第五十六

杜僧明

周文育子寶安

侯瑱

侯安都

歐陽頎子紇

黃法氈

淳于量

章昭達

吳明徹裴子烈

南史卷六十七

列傳第五十七

胡穎

徐度子噉成

杜稜

周鐵虎

程靈洗

子文季

沈恪

陸子隆

錢道戢

駱文牙

孫瑒

徐世譜

周敷

荀朗

周炆

魯悉達

弟廣達

蕭摩訶

子世廉

任忠

樊毅

弟猛

南史卷六十八

列傳第五十八

趙知禮

蔡景歷

子徵

宗元饒

韓子高

華皎

劉師知

謝岐

毛喜

沈君理

陸山才

南史卷六十九

列傳第五十九

沈炯

虞荔 弟寄

傅縡 章華

顧野王 蕭濟

姚察

南史卷七十

列傳第六十

循吏

吉翰

杜驥

申怙

杜慧慶

阮長之

甄法崇

孫彬

傅琰

孫岐

虞愿

王洪軌

李珪之

沈瑀

范述曾

孫謙

從子廉

何遠

郭祖深

列傳第六十一

儒林

伏曼容

子暉  
暉子挺

何佟之

嚴植之

司馬筠

卞華

崔靈恩

孔僉

盧廣

沈峻

太史叔明  
峻子文阿

孔子祛

皇侃

沈洙

戚袞

鄭灼

張崖  
陸詡  
沈德威  
賀德基

全緩

張譏

顧越

龔孟舒

沈不害

王元規

陸慶

南史卷七十二

列傳第六十二

文學

丘靈鞠

子遲從孫仲孚

檀超

熊襄超叔道鸞吳邁遠

卞彬

諸葛勗高爽

孫抱袁嘏

丘巨源

孔廣司馬憲

孔道袁仲明

虞通之孫詵

虞蘇

王智深

崔慰祖

祖沖之

子暉之來疑

孫皓

賈希鏡

袁峻

劉昭 子緝 緩

鍾嶸 兄阮 弟嶼

周興嗣

吳均 江洪

劉勰

何思澄 子朗 王子雲

任孝恭

顏協

紀少瑜

杜之偉

顏晃

岑之敬

何之元

徐伯陽

張正見

阮卓

南史卷七十三



列傳第六十三

孝義上

龔穎

劉瑜

董陽

賈恩

郭世通

子原平

嚴世期

吳達

潘綜

陳遺

秦綿

張進之

俞僉

張楚

丘傑

師覺授

王彭

蔣恭

徐耕

嚴成

王道蓋

孫法宗

范叔孫

吳國夫

卜天與

張弘之等  
天與弟天生

許昭先

余齊人

孫棘

妻許 徐元妻許 錢延慶

何子平

崔懷順

王虛之

顧昌衍 江柔之 江軻

吳慶之

蕭叡明

鮮于文宗 文宗姊文英

蕭矯妻羊

羊緝之女佩任 吳翼之母丁 蔣儁之妻黃

永興概中里王氏女 諸暨屠氏女 吳興乘公濟妻姚

吳郡范法恂妻褚

公孫僧遠

吳欣之

韓係伯

丘冠先

孫淡

華寶

薛天生  
劉懷胤

解叔謙

宗元卿  
匡昕

庾震  
魯康祚

朱文濟  
謝昌寓

韓靈敏

劉颯

弟謙  
柳叔夜

封延伯

陳玄子  
范安祖

邵榮興  
李聖伯

文獻叔  
范道根

徐生  
譚弘

何弘  
王續祖

陽黑頭  
郝道福

吳達之

蔡曇智  
何伯興

王文殊

樂頤之

弟預  
沈昇之

江泌

庾道愍

族孫沙彌  
沙彌子持

南史卷七十四

列傳第六十四

孝義下

滕曇恭

徐普濟  
張弟等

陶季直

沈崇儔

荀匠

吉玠

甄恬

趙拔扈

韓懷明

褚脩

張景仁

宛陵女子  
劉景昕

衛敬瑜妻王

陶子鏘

成景儁

李慶緒

謝蘭

子貞

殷不害

弟不佞

司馬暲

張昭

弟乾  
王知玄

南史卷七十五

列傳第六十五

隱逸上

陶潛

宗少文

孫測  
從弟彧之

沈道虔

孔淳之

周續之

戴顒

翟法賜

雷次宗

郭希林

劉凝之

龔祈

朱百年

關康之

辛普明樓惠明

漁父

褚伯玉

顧歡

盧度

杜京產

孔道徽剡縣小兒

京產子栖

南史卷七十六

列傳第六十六

隱逸下

臧榮緒

吳苞

趙僧巖孔嗣之

蔡蒼

徐伯珍

婁幼瑜

沈麟士

阮孝緒

鄧郁

陶弘景

釋寶誌

諸葛璩

劉慧斐

兄慧鏡  
慧鏡子曇淨

范元琰

庾詵

張孝秀

庾承先

馬樞

南史卷七十七

列傳第六十七

恩倖

戴法興

戴明寶

徐爰

阮佃夫

紀僧真

劉係宗

茹法亮

呂文顯

茹法珍

梅蟲兒

周石珍

陸驗 徐驥

司馬申

施文慶

沈客卿

孔範

南史卷七十八

列傳第六十八

夷貊上

海南諸國

林邑國

扶南國

西南夷

訶羅陁國

訶羅單國



婆皇國

波達國

闍婆達國

槃槃國

丹丹國

于陁利國

狼牙脩國

婆利國

中天竺國

天竺迦毗黎國

師子國

南史卷七十九

列傳第六十九

夷貊下

東夷

高句麗

百濟

新羅

倭

交身

大漢

扶桑

西戎

河南王

宕昌

鄧至

武興

諸蠻

荊雍州蠻

豫州蠻

西域

高昌

滑

呵跋檀

白題

龜茲

于闐

渴盤陁

末

波斯

北狄

蠕蠕

南史卷八十

列傳第七十

賊臣

侯景

王偉

熊曇朗

周迪

留異

陳寶應

南史目錄

南史目錄考證

齊本紀上第四武帝諱贖○贖監本訛贖今改正

列傳第八蕭思話附惠明弟惠基○弟監本訛子今改

正

列傳第十一王弘子錫錫弟僧達○錫弟二字監本訛

孫又僧祐子籍監本訛藉今俱改正

列傳第十三王彧附份孫銓錫僉通勸○監本孫訛弟

勸訛勵今俱改正

列傳第十四王裕之附阮韜○阮監本訛元又王淮之

下脫曾孫清清子猛六字從弟逵之下脫珪之二字

今俱改正

列傳第十五到彥之附漑弟洽○監本脫漑弟二字今  
增入又張興世子欣泰訛欣爲興今改正

列傳第十七孔琳之孫覬○覬監本訛顛今從本傳

列傳第十八褚裕之附彥回子賁○賁監本訛蕢又下  
蒙子玠監本訛介今俱改正

列傳第二十二張邵附融弟寶積○監本脫融弟二字  
又下文伯從弟嗣伯監本脫從字今俱增入

列傳第二十五庾悅附登之弟仲文○弟監本訛子今

改正

列傳第二十六羊玄保子戎兄子希○監本脫子戎兄  
子希五字今增入

列傳第二十七宗慤從子夬○夬監本訛史今改正  
列傳第二十九劉劬附孝綽子諒孝綽弟潛○監本脫  
孝綽子諒孝綽弟七字今從本傳增入

列傳第三十一安陸昭王紆○紆監本訛緬今改正  
列傳第五十二賀瑒○瑒監本訛瑒今從梁書

列傳第五十五衡陽獻王昌○監本脫獻字今增入  
文帝諸子○此下二十行缺今增正

列傳第六十三徐耕附嚴成王道蓋○監本缺嚴成王



道蓋五字又卜天與下缺張弘之等四字孫棘妻許  
下衍之字蕭獻明附鮮于文宗後缺文宗姊文英五  
字蕭矯妻羊附吳興乘公濟妻姚訛乘公爲公乘又  
公孫僧遠訛遠爲達樂頤之弟預後沈昇之訛昇爲  
升今俱從本傳改正

列傳第六十四滕曇恭附徐普濟張悌等○監本滕訛  
藤脫等字又沈崇僚僚訛素今俱改正

列傳第六十六劉惠斐兄慧鏡慧鏡子曇淨○淨監本  
訛淨今改正

列傳第六十九鄧至武興○此下十七行監本缺今從

南本增入又南本滑訛猾亦改正

南史目錄考證

南史卷一

唐

李

延

壽

撰

宋本紀上第一

宋高祖武皇帝諱裕字德輿小字寄奴彭城縣綏輿里人姓劉氏漢楚元王交之二十一世孫也彭城楚都故苗裔家焉晉氏東遷劉氏移居晉陵丹徒之京口里皇祖靖晉東安太守皇考翹字顯宗郡功曹帝以晉哀帝興寧元年歲在癸亥三月壬寅夜生神光照室盡明是夕甘露降于墓樹及長雄傑有大度身長七尺六寸風骨奇偉不事廉隅小節奉繼母以孝聞嘗游京口竹林

寺獨臥講堂前上有五色龍章衆僧見之驚以白帝帝獨喜曰上人無妄言皇考墓在丹徒之候山其地秦史所謂曲阿丹徒間有天子氣者也時有孔恭者妙善占墓帝嘗與經墓欺之曰此墓何如孔恭曰非常地也帝由是益自負行止時見二小龍附翼樵漁山澤同侶或亦覩焉及貴龍形更大帝素貧時人莫能知唯琅邪王謚獨深敬焉帝嘗負刁達社錢三萬經時無以還被達執謚以已錢代償由是得釋後伐荻新洲見大蛇長數丈射之傷明日復至洲裏聞有杵臼聲往覘之見童子數人皆青衣於榛中擣藥問其故荅曰我王爲劉寄奴

所射合散傅之帝曰王神何不殺之荅曰劉寄奴王者不死不可殺帝叱之皆散仍收藥而反又經客下邸逆旅會一沙門謂帝曰江表當亂安之者其在君乎帝先患手創積年不愈沙門有一黃藥因留與帝既而忽亡帝以黃散傅之其創一傅而愈寶其餘及所得童子藥每遇金創傅之竝驗初爲冠軍孫無終司馬晉隆安三年十一月祆賊孫恩作亂於會稽朝廷遣衛將軍謝琰前將軍劉牢之東討牢之請帝參府軍事命與數十人覘賊遇賊衆數千帝便與戰所將人多死而帝奮長刀所殺傷甚衆牢之子敬宣疑帝爲賊所困乃輕騎尋之

既而衆騎竝至遂平山陰恩遁入海四年五月恩復入  
會稽殺謝琰十一月牢之復東征使帝戍句章句章城  
小人少帝每戰陷陣賊乃退還浹口時東伐諸將士卒  
暴掠百姓皆苦之惟帝獨無所犯五年春恩頻攻句章  
帝屢破之恩復入海三月恩北出海鹽帝築城于故海  
鹽賊日來攻城城內兵少帝乃選敢死士擊走之時雖  
連勝帝深慮衆寡不敵乃一夜偃旗示以羸弱觀其懈  
乃奮擊大破之恩知城不可下進向滬瀆帝棄城追之  
海鹽令鮑陋遣子嗣之以吳兵一千爲前驅帝以吳人  
不習戰命之在後不從是夜帝多設奇兵兼置旗鼓明

日戰伏發賊退嗣之追奔陷沒帝且退且戰麾下死傷將盡乃至向處止令左右解取死人衣以示暇賊疑尚有伏乃引去六月恩浮海至丹徒帝兼行與俱至奔擊大破之恩至建鄴知朝廷有備遂走鬱洲八月晉帝以帝爲下邳太守帝又追恩至鬱洲及海鹽頻破之恩自是饑饉奔臨海元興元年荊州刺史桓玄舉兵東下驃騎將軍司馬元顯遣牢之拒之帝又參其軍事玄至帝請擊之牢之不許乃遣子敬宣詣玄請和帝與東海何無忌竝固諫不從玄剋建鄴以牢之爲會稽內史牢之懼招帝於廣陵舉兵帝曰人情去矣廣陵亦豈可得之



牢之竟縊於新洲何無忌謂帝曰我將何之帝曰可隨  
我還京口玄必守臣節當與卿事之不然與卿圖之玄  
從兄脩以撫軍將軍鎮丹徒以帝爲中兵參軍孫恩自  
敗後懼見獲乃投水死於臨海餘衆推恩妹夫盧循爲  
主玄復遣帝東征二年循奔永嘉帝追破之六月加帝  
彭城內史十二月桓玄篡位遷晉帝於尋陽桓脩入朝  
帝從至建鄴玄見帝謂司徒王謚曰昨見劉裕風骨不  
恒蓋人傑也每游集贈賜甚厚玄妻劉氏尚書令耽之  
女也聰明有智鑒常見帝因謂玄曰劉裕龍行虎步視  
瞻不凡恐必不爲人下宜早爲其所玄曰我方平蕩中

原非裕莫可待關隴平定然後議之脩尋還京口帝託以金創疾動不堪步從乃與無忌同船共還建興復計及弟道規沛國劉毅平昌孟昶任城魏詠之高平檀憑之琅邪諸葛長人太原王元德隴西辛扈興東莞童厚之竝同義謀時桓脩弟弘爲青州刺史鎮廣陵道規爲弘中兵參軍昶爲州主簿乃令毅就昶謀共襲弘長人爲豫州刺史刁達左軍府參軍謀據歷陽相應元德厚之謀於建鄴攻立剋期齊發三年二月乙卯帝託游獵與無忌詠之憑之毅從弟藩憑之從子韶祇隆道濟昶族弟懷玉等集義徒凡二十七人願從者百餘人丙辰

候城門開無忌等義徒服傳詔服稱詔居前義衆馳入齊叫吏士驚散卽斬脩以徇帝哭之甚慟厚加歛卹和勸弘其日出獵未明開門出獵人昶道規毅等率壯士五六十人因開門直入弘方噉粥卽斬之因收衆濟江義軍初剋京城脩司馬刁弘率文武佐吏來赴帝登城謂曰郭江州已奉乘輿反正於尋陽我等竝被密詔誅逆黨今日賊立之首已當梟於大航諸君非大晉之臣乎弘等信之而退毅旣至帝命誅弘等毅兄邁先在建鄴事未發數日帝遣同謀周安穆報之使爲內應邁甚懼安穆慮事發馳歸時立以邁爲竟陵太守邁便下船

欲之郡是夜玄與邁書曰北府人情云何卿近見劉裕何所道邁謂玄已知其謀晨起白之玄驚封邁爲重安侯又以不執安穆故殺之誅元德扈典厚之等乃遣頓丘太守吳甫之右衛將軍皇甫敷北拒義軍先是帝造游擊將軍何澹之左右見帝光曜滿室以告澹之澹之以白玄玄不以爲意至是聞義兵起甚懼或曰裕等甚弱陛下何慮之深玄曰劉裕足爲一世之雄劉毅家無擔石之儲樗蒲一擲百萬何無忌劉牢之之外甥酷似其舅共舉大事何謂無成時衆推帝爲盟主以孟昶爲長史總後事檀憑之爲司馬百姓願從者千餘人軍次

竹里移檄都下曰夫成敗相因理不常泰狡焉肆虐或  
遇聖明自我大晉屢遘陽九隆安以來皇家多故貞良  
弊於豺狼忠臣碎於虎口逆臣桓玄敢肆陵慢阻兵荆  
郢肆暴都邑天未忘難凶力寔繁踰年之間遂傾皇祚  
主上播越流幸非所神器沉辱七廟毀墜雖夏后之離  
泥豷有漢之遭莽卓方之於茲未足爲喻自玄篡逆于  
今歷載彌年亢旱人不聊生士庶疲於轉輸文武困於  
板築室家分析父子乖離豈惟大東有杼軸之悲標梅  
有頃筐之怨而已哉仰觀天文俯察人事此而可存孰  
有可亡凡在有心誰不扼腕裕等所以叩心泣血不遑

啓處者也是故夕寐宵興搜獎忠烈潛構崎嶇過於履  
虎乘機奮發義不圖全輔國將軍劉毅廣武將軍何無  
忌鎮北主簿孟昶兗州主簿魏詠之寧遠將軍劉道規  
龍驤參軍劉藩振威將軍檀憑之等忠烈斷金精白貫  
日荷戈俟奮志在畢命益州刺史毛璩萬里齊契掃定  
荆楚江州刺史郭昶之奉迎主上官于尋陽鎮北將軍  
王元德等竝率部曲保據石頭揚武將軍諸葛長人收  
集義士已據歷陽征虜參軍庾曠之等潛相連結以爲  
內應同力協契所在蠡起卽日斬僞徐州刺史安成王  
脩青州刺史弘義衆旣集文武爭先咸謂不有一統則

事無以緝裕辭不獲命遂總軍要庶上憑祖宗之靈下  
罄義夫之節翦馘逋逆蕩清京華公侯諸君或世樹忠  
貞或身荷爵寵而竝俛眉猾豎無由自效顧瞻周道寧  
不弔乎今日之舉良其會也裕以虛薄才非古人受任  
於旣頽之運接勢於已替之機丹誠未宣感慨憤激望  
霄漢以永懷盼山川以增佇投檄之日神馳賊庭三月  
戊午遇吳甫之於江乘帝躬執長刀大呼卽斬甫之進  
至羅洛橋遇皇甫敷檀憑之戰敗死之衆退帝進戰彌  
厲又斬敷首初帝建大謀有工相者相帝與無忌等近  
當大貴惟云憑之無相至是憑之戰死帝知其事必捷

玄聞敷等沒使桓謙屯東陵口卞範之屯覆舟山西已未義軍進至覆舟東張疑兵以油帔冠諸樹布滿山谷帝先馳之將士皆殊死戰無不一當百呼聲動天地因風縱火煙焰張天謙等大敗玄始雖遣軍而走意已決別遣領軍殷仲文具舟石頭聞謙敗輕船南逸庚申帝鎮石頭城立留臺總百官焚桓溫主於宣陽門外造晉新主於太廟遣諸將追玄命尚書王嘏率百官奉迎乘輿司徒王謐與衆議推帝領揚州帝固辭乃以謐爲錄尚書事領揚州刺史帝爲鎮軍將軍都督八州諸軍事徐州刺史領軍將軍初晉陵人韋叟善相術桓脩令相



帝當得州不叟曰當得邊州刺史退而私於帝曰君相  
貴不可言帝笑曰若中當相用爲司馬至是叟詣帝曰  
成王不負桐葉之信公亦應不忘司馬之言今不敢希  
鎮軍司馬願得領軍佐於是用焉時諸葛長人失期爲  
刁達執送未至而玄敗玄經尋陽江州刺史郭昶之爲  
具乘輿法物初荊州刺史王綏以江左冠族又桓氏之  
甥素甚陵帝至是及其父尚書左僕射愉有自疑志竝  
及誅四月戊子奉武陵王遵爲大將軍承制大赦惟桓  
氏一祖後不免桓玄之篡王謚佐命手解安帝璽紱及  
義旗建衆謂謚宜誅惟帝素德謚保持之劉毅嘗因朝

會問謚璽紱所在謚益懼及王愉父子誅謚從弟湛謂謚曰王駒無罪而誅此是翦除勝己兄旣桓氏黨附求免得乎駒愉小字也謚懼奔曲阿帝賤白大將軍迎還復其位立挾天子走江陵又浮江東下與劉毅何無忌劉道規等遇於崢嶸洲衆軍大破之立黨殷仲文奉晉二皇后還建鄴立復挾天子至江陵因走南郡太守王騰之荊州別駕王康產奉天子入南郡府初益州刺史毛璩遣從孫祐之與參軍費恬送弟喪下州璩弟子脩之時爲立屯騎校尉誘立入蜀至枚回洲恬與祐之迎射之益州督護馮遷斬立傳首建鄴立從子振逃於華

容之涌中招集逆黨襲江陵城騰之康產皆被殺桓謙  
先匿沮川亦聚衆應振爲立舉哀立喪庭謙率衆官奉  
璽綬于安帝劉毅何無忌進及桓振戰敗績于靈谿十  
月帝領青州刺史甲仗百人入殿義熙元年正月毅等  
至江津破桓謙桓振江陵平三月甲子晉帝至自江陵  
庚子詔進帝侍中車騎將軍都督中外諸軍錄尚書事  
帝固讓旋鎮丹徒九月乙巳加帝領兗州刺史盧循浮  
海破廣州獲刺史吳隱之卽以循爲廣州刺史以其黨  
徐道覆爲始興相二年三月進帝督交廣二州十月論  
匡復勳封帝豫章郡公邑萬戶賜絹三萬疋其餘封賞

各有差三年十二月司徒錄尚書揚州刺史王謐薨四年正月徵帝入輔授侍中車騎將軍開府儀同三司揚州刺史錄尚書事徐兗二州刺史如故表解兗州先是帝遣冠軍劉敬宣伐蜀賊譙縱無功而還九月帝以敬宣挫退遜位不許十月乃降爲中軍將軍開府如故五年二月僞燕主慕容超大掠淮北三月帝抗表北討以丹陽尹孟昶監中軍留府事乃浮淮入泗五月至下邳留船步軍進琅邪所過築城留守超大將公孫五樓請斷大峴堅壁清野以待超不從初謀是役議者以爲賊若嚴守大峴軍無所資何能自反帝曰不然鮮卑性貪

略不及遠旣幸其勝且愛其穀必將引我且亦輕戰師  
一入峴吾何患焉及入峴帝舉首指天曰吾事濟矣衆  
問其故帝曰師旣過險士有必死之志餘糧栖畝軍無  
匱乏之憂勝可必矣六月超留羸老守廣固使其廣甯  
王賀刺盧及公孫五樓悉力據臨朐去城四十里有巨  
茂水超告五樓急據之比至爲龍驤將軍孟龍符所保  
五樓乃退大軍分車四千兩爲二翼方軌徐行車張幟  
御者執稍以騎爲游軍軍令嚴肅比及臨朐賊騎交至  
帝命兗州刺史劉藩并州刺史劉道憐等陷其陣日向  
昃戰猶酣帝用參軍胡藩策襲剋臨朐賊乃大奔超遁

還廣固獲其玉璽豹尾輦等送于都丙子剋廣固大城  
超固其小城乃設長圍以守之館穀於青土停江淮轉  
輸七月超尚書郎張綱乞師於姚興自長安反太山太  
守申宣執送之綱有巧思先是帝修攻具城上人曰汝  
不得張綱何能爲也及至升諸樓車以示之城內莫不  
失色超旣求救不獲綱反見虜乃求稱藩割大峴爲界  
獻馬千匹不聽時姚興遣使聲言將涉淮左帝謂曰爾  
報姚興我定青州將過函谷虜能自送今其時矣錄事  
參軍劉穆之遽入曰此言不足威敵容能怒彼若鮮卑  
未拔西羌又至公何以待之帝乃笑曰此兵機也非子

所及羌若能救不有先聲是自彊也十月張綱修攻具成設飛樓縣梯木幔板屋冠以牛皮弓矢無所用之劉毅遣上黨太守趙恢以千餘人來援帝夜潛遣軍會之明旦恢衆五千方道而進每晉使將到輒復如之六年二月丁亥屠廣固超踰城走追獲之斬于建康市殺其王公以下納生口萬餘馬二千匹初帝之北也徐道覆勸盧循乘虛而出循不從道覆乃至番禺說循曰今日之機萬不可失若剋京都劉公雖還無能爲也循從之是月寇南康廬陵豫章諸郡郡守皆奔走時帝將鎮下邳進兵河洛及徵使至卽日班師鎮南將軍何無忌與

道覆戰敗死於豫章內外震駭朝議欲奉乘輿北走帝  
次山陽聞敗卷甲與數十人造江上徵問知賊尚未至  
四月癸未帝至都劉毅自表南征帝以賊新捷鋒銳須  
嚴軍偕進使劉藩止之毅不從五月壬午盧循敗毅于  
桑落洲及審帝凱入相視失色欲還尋陽平江陵據二  
州以抗朝廷道覆請乘勝遂下爭之旬日乃從于時北  
師始還傷痍未復戰士纔數千賊衆十餘萬舳艫亘千  
里孟昶諸葛長人懼欲擁天子過江帝曰今兵士雖少  
猶足一戰若其剋濟臣主同休如其不然不復能草間  
求活吾計決矣初帝征慕容超惟孟昶勸行丙辰昶乃



表天子引罪仰藥而死時議者欲分兵屯守諸津帝曰賊衆我寡分其兵則測人虛實一處失利則沮三軍之心若聚衆石頭則衆力不分戊午帝移鎮石城乙丑賊大至帝曰賊若新亭直上且將避之若回泊蔡洲成禽耳徐道覆欲自新亭焚舟而戰循多疑少決每求萬全乃泊蔡洲以待軍潰帝登石頭以望見之悅庚辰賊設伏於南岸疑兵向白石帝率劉毅諸葛長人北拒焉留參軍徐赤特戍查浦戒令勿戰帝旣北賊焚查浦而至張侯橋赤特與戰大敗賊進屯丹陽郡帝馳還石頭斬徐赤特解甲久之乃出陣於南塘七月庚申循自蔡洲

退將還歸尋陽帝遣輔國將軍王仲德等追之使建威將軍孫處自海道襲番禺戒之曰我十二月必破祆寇卿亦足至番禺先傾其巢窟也十月帝率舟師南伐使劉毅監太尉留府是月徐道覆寇江陵荊州刺史劉道規大破之道覆走還湓口十一月孫處至番禺剋其城盧循父嘏奔始興處撫其人以守十二月己卯大軍次大雷庚辰賊方江而下帝躬提幡鼓命衆軍齊力擊之軍中多萬鈞神弩所至莫不摧陷帝自於中流蹙之因風水之勢賊艦悉薄西岸岸上軍先備火具焚之大敗循還尋陽遂走豫章悉力柵左里丙申大軍次左里將

戰帝麾之麾竿折幡沉于水衆咸懼帝笑曰昔覆舟之役亦如此今勝必矣攻其柵循單舸走衆皆降師旋晉帝遣侍中黃門勞師于行所七年正月己未振旅而歸改授大將軍揚州牧給班劔二十人本官竝如故固辭凡南北征伐戰亡者竝列上賻贈屍喪未反者遣主帥迎接致還本土二月盧循至番禺爲孫處所破收餘衆南走劉藩孟懷玉斬徐道覆于始興自晉中興以來朝綱弛紊權門兼并百姓流離不得保其產業桓立頗欲釐改竟不能行帝旣作輔大示軌則豪彊肅然遠近禁止至是會稽餘姚唐亮復藏匿亡命千餘人帝誅亮免

會稽內史司馬休之晉帝又申前詔帝固辭於是改授  
太尉中書監乃受命奉送黃鉞交州刺史杜惠度斬盧  
循父子函七首送都先是諸州郡所遣秀才孝廉多非  
其人帝乃表申明舊例策試之荊州刺史劉道規疾患  
求歸八年四月改授豫州刺史以豫州刺史劉毅代之  
毅既有雄才大志與帝俱興復晉室自謂京城廣陵功  
足相抗雖權事推帝而心不服也厚自矜許朝士素望  
者竝多歸之與尚書僕射謝混丹陽尹郝僧施竝深相  
結及鎮江陵豫州舊府多割以自隨請僧施爲南蠻校  
尉帝知毅終爲異端心密圖之毅至西稱疾篤表求從

兖州刺史藩以爲副貳帝僞許焉九月藩入朝帝命收藩及謝混竝賜死自表討毅又假黃鉞率諸軍西征以前鎮軍將軍司馬休之爲平西將軍荊州刺史兖州刺史道憐鎮丹徒豫州刺史諸葛長人監太尉留府事加太尉司馬丹陽尹劉穆之建威將軍配以實力壬午發建鄴遣參軍王鎮惡龍驤將軍蒯恩前襲江陵剋之毅及黨與皆伏誅十一月帝至江陵分荊州十郡爲湘州帝仍進督焉以西陵太守朱齡石爲益州刺史使伐蜀晉帝進帝太傅揚州牧加羽葆鼓吹班劔二十人九年二月乙丑帝至自江陵初諸葛長人貪淫驕橫帝每

優容之劉毅既誅長人謂所親曰昔年醢彭越今年殺韓信禍其至矣將謀作亂帝剋期至都而每淹留不進公卿以下頻日奉候於新亭長人亦驟出既而帝輕舟密至已還東府矣長人到門引前却人閑語凡平生言所不盡者皆與及之長人甚悅帝已密命左右丁昨自幔後出於坐拉焉死於牀側輿屍付廷尉并誅其弟黎人昨驍勇有力時人語曰勿跋扈付丁昨先是山湖川澤皆爲豪彊所奪百姓薪採漁釣皆責稅直至是禁斷之時人居未一帝上表定制於是依界土斷惟徐兗青三州居晉陵者不在斷例諸流寓郡縣多所併省以帝

領鎮西將軍豫州刺史帝固讓太傅揚州牧及班劬奉  
還黃鉞七月朱齡石平蜀斬譙縱傳首建鄴九月晉帝  
以帝平齊定盧循功封帝次子義眞爲桂陽縣公并重  
申前命授帝太傅揚州牧加羽葆鼓吹班劬二十人將  
吏百僚敦勸乃受羽葆鼓吹班劬餘固辭十年息人簡  
役築東府城起府舍帝以荊州刺史司馬休之宗室之  
重又得江漢人心疑其有異志而休之子譙王文思在  
都招聚輕俠帝執送休之命自爲其所休之表廢文思  
并與帝書陳謝十一年正月帝收休之子文寶兄子文  
祖竝賜死率衆西討復加黃鉞領荊州刺史以中軍將

軍道憐監留府事休之上表自陳并非狀帝休之府錄  
事參軍韓延之有幹用才帝未至江陵密書招之延之  
報書曰承親率戎馬遠履西偏闔境士庶莫不惶駭辱  
疏知以譙王前事良增歎息司馬平西體國忠貞款懷  
待物以公有匡復之勳家國蒙賴推德委誠每事詢仰  
譙王往以微事見劾猶自表遜位況以大過而當默邪  
來示云處懷期物自有由來今伐人之君陷人以利真  
可謂處懷期物者矣劉藩死於闔闔之門諸葛斃於左  
右之手甘言詫方伯襲之以輕兵遂使席上靡款懷之  
士聞外無自信諸侯以爲得算良所恥也吾雖鄙劣嘗



南史卷一  
本紀  
三

聞道於君子以平西之至德寧可無授命之臣乎假天  
長喪亂九流渾濁當與臧洪游於地下不復多云帝視  
書歎息以示將佐曰事人當如此三月軍次江陵初雍  
州刺史魯宗之負力好亂且慮不爲帝容常爲讖曰魚  
登日輔帝室與休之相結至是率其子竟陵太守軌會  
于江陵帝濟江休之衆潰與軌等奔襄陽江陵平加領  
南蠻校尉將拜南蠻遇四廢日佐史鄭鮮之等白遷日  
不許下書開寬大之恩四月進軍襄陽休之等奔姚興  
晉帝復申前令授太傅揚州牧劔履上殿入朝不趨讚  
拜不名加前部羽葆鼓吹置左右長史司馬從事中郎

四人封第三子義隆爲北彭城縣公八月甲子帝至自江陵奉還黃鉞固辭太傅州牧前部羽葆鼓吹其餘受命十二年正月晉帝詔帝依舊辟士加領平北將軍兗州刺史增督南秦凡二十二州帝以平北文武寡少不宜別置於是罷平北府以併太府三月加帝中外大都督初帝平齊仍有定關洛意遇盧循侵逼故寢及荆雍平乃謀外略會姚興死子泓新立兄弟相殺關中擾亂四月乙丑帝表伐關洛乃戒嚴北討加領征西將軍司豫二州刺史以世子爲徐兗二州刺史帝以義聲懷遠奉琅邪王北伐五月廬江霍山崩獲六鍾獻之天子癸

已加領北雍州刺史前後部羽葆鼓吹增班劔爲四十人八月乙巳率大衆進發以世子爲中軍將軍監太尉留府事尚書右僕射劉穆之爲左僕射領監軍中軍二府軍司入居東府總攝內外九月帝至彭城加領北徐州刺史十月衆軍至洛圍金墉降之修復晉五陵置守衛十二月壬申晉帝加帝位相國總百揆揚州牧封十郡爲宋公備九錫之禮加璽紱遠游冠綠綬綬位在諸侯王上策曰朕以寡昧仰纘洪基夷羿乘釁蕩覆王室越在南鄙遷于九江宗祀絕饗人神無位提挈羣凶寄命江浦則我祖宗之烈奄墜于地七百之祚翦焉旣傾

若涉巨海罔知攸濟天未絕晉誕育英輔振厥弛維再  
造區寓興亡繼絕俾昏作明元勳至德朕實攸賴今將  
授公典策其敬聽朕命乃者桓玄肆僭滔天泯夏拔本  
塞源顛蹶六位庶僚俛眉四方莫恤公精貫朝日氣陵  
虹蜺奮其靈武大殲羣慝剋復皇邑奉歆神祇此公之  
大節始於勤王者也授律羣后順流長驚薄伐崢嶸獻  
捷南郢大憝折首羣逆畢夷三光旋采舊物反正此又  
公之功也出藩入輔弘茲保弼阜財利用繁殖黎元編  
戶歲滋疆宇日啓導德明刑四境有截此又公之功也  
鮮卑負衆僭盜三齊介恃遐阻仍爲邊害公蒐乘秣馬

箕入遠疆衝櫓四臨萬雉俱潰拓土三千申威龍漠此  
又公之功也盧循祇凶伺隙五嶺侵覆江豫矢及王城  
國議遷都之規家獻徙卜之計公乘轅南濟義形于色  
運奇搆略英謨不世狡寇窮衄喪旗宵遁俾我畿甸拯  
於將墜此又公之功也追奔逐北揚旂江濱偏旅浮海  
指日遄至番禺之功俘級萬數左里之捷烏散魚潰元  
凶遠竄傳首萬里此又公之功也劉毅叛換負釁西夏  
陵上罔主志肆姦暴公禦軌以刑消之不日罪人斯得  
荆衡寧晏此又公之功也譙縱怙亂寇竊一隅王化阻  
閔三巴淪溺公指命偏帥授以良圖陵波憑湍致屈井

絡僭豎伏鑽梁岷草偃此又公之功也馬休魯宗阻兵  
內侮驅率二方連旗稱亂公投袂星言研其上略江津  
之師勢踰風電回旆汚川實繁震懾二叛奔迸荆雍來  
蘇此又公之功也永嘉不競四夷擅華五都傾蕩山陵  
幽辱祖宗懷沒世之憤遺眚有匪風之思公遠齊阿衡  
納隍之仁近同小白滅亡之恥鞠旅陳師赫然大號分  
命羣帥北徇司兗許鄭風靡輦洛載清百年榛穢一朝  
掃滌此又公之功也公有康宇內之勳重之以明德爰  
初發跡則奇謨冠古電擊彊祆則鋒無前對聿寧東畿  
大造黔首若乃草昧經綸化融於歲計扶危靜亂道固

於包桑蠲削煩苛較若畫一淳風美化盈塞區寓是以  
絕域獻琛遐夷納賚王略所亘九服率從雖文命之東  
漸西被咎繇之邁于種德何以尚茲朕聞先王之宰世  
也庸勳尊賢建侯胙土褒以寵章崇其徽物所以協輔  
皇室永隆藩屏故曲阜光啓遂荒徐宅營丘表海四履  
有聞其在襄王亦賴匡霸又命晉文備物光賜惟公道  
冠前列勳高振古而殊典未飾朕甚惜焉今進授相國  
以徐州之彭城沛蘭陵下邳淮陽山陽廣陵兗州之高  
平魯泰山十郡封公爲宋公錫茲立土苴以白茅爰定  
爾居用建冢社昔晉鄭啓藩入作卿士周召保傳出總

二南內外之任公實兼之今命使持節兼太尉尚書左僕射晉寧縣五等男湛授相國印綬宋公璽紱使持節兼司空散騎常侍尚書陽遂鄉侯泰授宋公茅土金虎符第一至第五左竹使符第一至第十左相國位無不總禮絕朝班居常之名宜與事革其以相國總百揆去錄尚書之號上送所假節侍中貂蟬中外都督太傅太尉印綬豫章公印策進揚州刺史爲牧領征西將軍司豫北徐雍四州刺史如故公紀綱禮度萬國是式乘介蹈方罔有遷志是用錫公大路戎路各一立牡二駟公抑末敦本務農重積采繫寔殷稼穡惟阜是用錫公袞



冕之服赤舄副焉公閑邪納正移風改俗陶鈞品物如  
樂之和是用錫公軒縣之樂六佾之儻公宣美王化導  
揚休風華夷企踵遠人胥萃是用錫公朱戶以居公官  
方任能網羅幽滯九臯辭野髦士盈朝是用錫公納陛  
以登公當軸處中率下以義式遏寇讎滌除苛慝是用  
錫公虎賁之士三百人公明罰恤刑庶獄詳允放命于  
紀罔有攸縱是用錫公鈇鉞各一公龍驤鳳翥咫尺八  
紘括囊四海折衝無外是用錫公彤弓一彤矢百旅弓  
十旅矢千公溫恭孝思致虔禋祀忠肅之志儀刑四方  
是用錫公柅轡一卣圭瓚副焉宋國置丞相以下一遵

有命金吉其福用行命茂聖天子休簡惟庶手荷虜黠德  
以終我高祖之嘉命置宋國侍中黃門侍郎尚書左丞  
相大使奉迎抱罕虜乞伏熾盤遣使謁帝求効力討姚  
泓拜爲平西將軍河南公十三年正月帝以舟師進討  
留彭城公義隆鎮彭城軍次陳留城經張良廟下令以  
時修飾棟宇致薦焉晉帝追贈帝祖爲太常父爲特進  
左光祿大夫讓不受二月冠軍將軍檀道濟等軍次潼  
關三月庚辰帝率大軍入河五月帝至洛陽謁晉五陵  
七月至陝龍驤將軍王鎮惡舟師自河浮渭八月扶風  
太守沈田子大破姚泓軍於藍田王鎮惡剋長安禽姚

泓始義熙九年歲鎮熒惑太白聚東井至是而關中平  
九月帝至長安長安豐稔帑藏盈積帝先收其彝器渾  
儀土圭記里鼓指南車及秦始皇玉璽送之都其餘珍  
寶珠玉悉以班賜將帥遷姚宗于江南送泓斬于建康  
市謁漢長陵大會文武於未央殿十月晉帝詔進宋公  
爵爲王加十郡益宋國竝前爲二十郡其相國揚州牧  
領征西將軍司豫北徐雍四州刺史如故帝欲息駕長  
安經略趙魏十一月前將軍劉穆之卒乃歸十二月庚  
子發自長安以桂陽公義真爲雍州刺史鎮長安留腹  
心將佐以輔之十四年正月壬戌帝至彭城解嚴息甲

以輔國將軍劉遵考爲并州刺史領河東太守鎮蒲坂  
帝解司州領徐冀二州刺史固讓進爵時漢中成固縣  
漢水崖際有異聲如雷俄頃岸崩有銅鍾十二出自潛  
壤鞏縣人宗曜於其田所獲嘉禾九穗同莖帝以獻晉  
帝以歸于我帝冲讓乃止六月丁亥受相國宋公九錫  
之命下令赦國內殊死以下詔崇豫章太夫人爲宋公  
太妃世子爲中軍將軍副貳相國府百官悉依天朝之  
制又詔宋國所封十郡之外悉得除用先是安西中兵  
參軍沈田子殺安西司馬王鎮惡諸將殺安西長史王  
脩關中亂十月帝遣右將軍朱齡石代安西將軍桂陽

公義真爲雍州刺史義真還爲赫連勃勃所追大敗僅  
以身免諸將帥及齡石竝沒十二月晉安帝崩大司馬  
琅邪王卽帝位元熙元年正月晉帝詔徵帝入輔又申  
前令公進爵爲王以徐州之海陵北東海北譙北梁豫  
州之新蔡兗州之北陳留司州之陳郡汝南潁川滎陽  
十郡增宋國七月乃受命赦國內五歲刑以下遷都壽  
陽九月解揚州十二月晉帝命帝冕十有二旒建天子  
旌旗出警入蹕乘金根車駕六馬備五時副車置旄頭  
雲罕樂儻八佾設鍾簋宮縣進王太妃爲太后王妃爲  
王后世子爲太子王子王孫爵命之號一如舊儀二年

正月帝表讓殊禮竟陵郡江濱自開出古銅禮器十餘枚帝獻之晉帝讓不受於是歸諸瑞物藏於相府四月詔遣敦勸兼徵帝入輔六月壬戌帝至都甲寅晉帝禪位于宋有司草詔既成請書之天子即便操筆謂左右曰桓玄之時天命已改重爲劉公所延將二十載今日之事本所甘心甲子遣使奉策曰咨爾宋王夫玄古權輿悠哉邈矣其詳靡得而聞爰自書契降逮三五莫不以上聖君四海止戈定大業然則帝王者宰物之通器君道者天下之至公也昔在上葉深鑒茲道是以天祿旣終唐虞弗得傳其嗣符命來格舜禹不獲全其謙所

以經緯三才澄序彝化作範振古垂風萬葉莫尚於茲  
自是厥後歷代彌劬漢旣嗣德於放勛魏亦方軌於重  
華諒以協謀乎人鬼而以百姓爲心者也昔我祖宗欽  
明辰居其極而明晦代序盈虧有期翦商兆禍非惟一  
世曾是弗剋矧伊在今天之所廢有自來矣惟王體上  
聖之姿包二儀之德明齊日月道合四時乃者社稷傾  
覆王拯而存之中原蕪梗又濟而復之自負固不賓干  
紀放命肆逆滔天竊據萬里靡不潤之以風雨震之以  
雷霆九伐之道旣敷八法之化自理豈伊博施於人濟  
斯黔庶固已義洽四海道盛八荒者矣至於上天垂象

四靈効徵圖讖之文既明人神之望已改百工歌於朝  
庶人頌乎野億兆抃踴傾佇惟新自非百姓樂推天命  
攸集豈伊在予所得獨專是用仰祇皇靈俯順羣議敬  
禪神器授帝位于爾躬大祚其窮天祿永終於戲王其  
允執其中敬遵典訓副率土之嘉願恢洪業於無窮時  
膺休祐以答三靈之眷望又遣使持節兼太保散騎常  
侍光祿大夫謝澹兼太尉尚書劉宣範奉璽書歸皇帝  
璽綬受終之禮一如唐虞漢魏故事帝奉表陳讓晉帝  
已遜于琅邪王第表不獲通於是陳留王虔嗣等二百  
七十人及宋臺羣臣竝上表勸進猶不許太史令駱達



陳天文符應曰案晉義熙元年至元熙元年太白晝見  
經天凡七占曰太白經天人更主異姓興義熙七年五  
虹見于東方占曰五虹見天子黜聖人出九年鎮星歲  
星太白熒惑聚于東井十三年鎮星入太微占曰鎮星  
守太微有立王有徙王元熙元年冬黑龍四登于天易  
傳曰冬龍見天子亡社稷大人受命冀州道人釋法稱  
告其弟子曰嵩神言江東有劉將軍漢家苗裔當授天  
命吾以璧三十二鎮金一餅與之劉氏卜世之數也漢  
建武至建安末一百九十六年而禪魏魏自黃初至咸  
熙末四十六年而禪晉晉自太始至今百五十六年三

代揖讓咸窮於六又漢光武社于南陽漢末而其樹死  
劉備有蜀迺應之而興及晉季年舊根始萌至是而盛  
矣若此者有數十條羣臣又固請乃從之

永初元年夏六月丁卯皇帝卽位於南郊設壇柴燎告  
天曰皇帝臣裕敢用玄牡昭告于皇皇后帝晉以下世  
告終歷數有歸欽若景運以命于裕夫樹君宰世天下  
爲公德充帝王樂推攸集越俶唐虞降暨漢魏靡不以  
爲上哲格文祖元勳陟帝位故能大拯黔首垂訓無窮  
晉自東遷四維不振宰輔焉依爲日已久難棘隆安禍  
成元興遂至帝主遷播宗祀堙滅裕雖地非齊晉衆無

一旅仰憤時難俯悼橫流投袂一起則皇祀剋復及危而能持顛而能扶姦宄具殲僭僞亦滅誠興廢有期否終有數至於大造晉室撥亂濟時因藉時來寔尸其重加以殊俗慕義重譯來庭正朔所暨咸服聲教至乃三靈垂象山川告祥人神協祉歲月滋著是以羣公卿士億兆夷人僉曰皇靈降鑒於上晉朝款誠於下天命不可以久淹宸極不可以暫曠遂逼羣議恭茲大禮猥以寡德託于兆人之上雖仰畏天威略是小節顧探永懷祇懼若實敬簡元日升壇受禪告類上帝用酬萬國之情克隆天保永祚于有宋惟明靈是饗禮畢備法駕幸

建康宮臨太極前殿大赦改元賜人爵二級鰥寡孤獨不能自存者人穀五斛逋租宿責勿收其犯鄉論清議贓污淫盜一皆蕩滌長徒之身特皆原遣亡官失爵禁錮奪勞一依舊準封晉帝爲零陵王全食一郡載天子旌旗乘五時副車行晉正朔郊祀天地禮樂制度皆用晉典上書不爲表荅表不稱詔宮于故秣陵追尊皇考爲孝穆皇帝妣爲穆皇后尊王太后爲皇太后詔曰夫微禹之感歎深後昆愛人懷樹猶或勿翦雖在異代義無廢絕降殺之儀一依前典可降始興公爲縣公廬陵公爲柴桑縣公始安公爲荔浦縣侯長沙公爲醴陵縣

侯康樂公卽降爲縣侯奉王導謝安溫嶠陶侃謝玄之  
祀其宣力義熙者一仍本秩庚午以司空道憐爲太尉  
封長沙王立南郡公義慶爲臨川王又詔論戰亡追贈  
及酬賞除復之科乙亥封皇子桂陽公義真爲廬陵王  
彭城公義隆爲宜都王義康爲彭城王丁丑使使巡行  
四方旌賢舉善問人疾苦獄訟虧濫政刑垂愆傷化擾  
俗未允人聽者皆具以聞戊寅詔增百官奉巳卯改晉  
泰始歷爲永初歷社以子臘以辰秋七月丁亥原放劫  
賊餘口沒在臺府者諸流徙之家竝聽還本又以市稅  
繁苦優量減降從征關洛殞身不反者贍賜其家巳丑

陳留王曹虔嗣薨辛卯復置五校三將官增殿中將軍  
員二十人餘在員外戊戌征西大將軍開府儀同三司  
楊盛進號車騎大將軍甲辰鎮西將軍李歆進號征西  
大將軍平西將軍乞伏熾盤進號安西大將軍征東將  
軍高句麗王高璉進號征東大將軍鎮東將軍百濟王  
扶餘映進號鎮東大將軍置東宮冗從僕射旅賁中郎  
將官戊申遷神主於太廟車駕親奉壬子詔改權制率  
從寬簡八月辛酉詔舊郡縣以北爲名者悉除之寓立  
於南者聽以南爲號戊辰詔曰彭城桑梓敦本斯隆宜  
同豐沛其沛郡下邳各復租布三十年辛未追諡妃臧

氏爲敬皇后陵曰永寧癸酉立王太子義符爲皇太子  
乙亥赦見罪人閏月壬午置晉帝諸陵守衛其名賢先  
哲詳加灑掃丁酉林邑國遣使朝貢九月壬子置東宮  
殿中將軍十人員外二十人壬申置都官尚書是歲魏  
明元皇帝太常五年西涼亡

二年春正月辛酉祀南郊大赦丙寅斷金銀塗以揚州  
刺史廬陵王義真爲司徒以尚書僕射徐羨之爲尚書  
令揚州刺史己卯禁喪事用銅釘罷會稽郡府二月己  
丑策試州郡秀孝于延賢堂倭國遣使朝貢三月乙丑  
初限荊州府置將不得過二千人吏不得過一萬人州

置將不得過五百人吏不得過五千人兵士不在此限  
夏四月己卯初禁淫祀除諸房廟其先賢以勳德立祠  
者不在此例戊辰聽訟於華林園五月己酉置東宮屯  
騎步兵翊軍二校尉官秋七月己巳地震九月己丑零  
陵王殂宋志也車駕率百僚臨于朝堂三日如魏明帝  
服山陽公故事使兼太尉持節護喪事葬以晉禮冬十  
月己亥以涼州胡帥大且渠蒙遜爲鎮軍大將軍開府  
儀同三司涼州刺史十一月辛亥葬晉恭皇帝于沖平  
陵車駕率百官瞻送

三年春正月甲辰朔詔刑罪無輕重悉原之癸丑以尚



書令揚州刺史徐羨之爲司空錄尚書事刺史如故進  
江州刺史王弘衛將軍開府儀同三司以太子詹事傅  
亮爲尚書僕射二月丙戌有星孛于虛危三月上不豫  
太尉長沙王道憐司空徐羨之尚書僕射傅亮領軍將  
軍謝晦護軍將軍檀道濟竝入侍醫藥羣臣請祈禱神  
祇上不許惟使侍中謝方明以疾告廟而已丁未以廬  
陵王義真爲侍中車騎將軍開府儀同三司南豫州刺  
史己未上疾瘳大赦夏四月乙亥封仇池公楊盛爲武  
都郡王五月上疾甚召太子戒之曰檀道濟雖有幹略  
而無遠志非如兄韶有難御之氣徐羨之傅亮當無異

圖謝晦常從征伐頗識機變若有異必此人也小却可  
以會稽江州處之又爲手詔朝廷不須復有別府宰相  
帶揚州可置甲士千人若大臣中任要宜有爪牙以備  
不祥人者可以臺見留隊給之有征討悉配以臺見軍  
隊行還復舊後世若有幼主朝事一委任宰相母后不  
煩臨朝仗既不許入臺殿門要重人可詳給班劔癸亥  
上崩于西殿時年六十七月己酉葬丹陽建康縣蔣山  
初寧陵羣臣上諡曰武皇帝廟號高祖上清簡寡欲嚴  
整有法度未嘗視珠玉輿馬之飾後庭無紈綺絲竹之  
音初朝廷未備音樂長史殷仲文以爲言帝曰日不暇

給且所不解仲文曰屢聽自然解之帝曰政以解則好之故不習耳寧州嘗獻虎魄枕光色甚麗價盈百金時將北伐以虎魄療金創上大悅命碎分賜諸將平關中得姚興從女有盛寵以之廢事謝晦諫卽時遣出財帛皆在外府內無私藏宋臺建有司奏東西堂施局脚牀金塗釘上不許使用直脚牀釘用鐵廣州嘗獻入筒細布一端八丈帝惡其精麗勞人卽付有司彈太守以布還之并制嶺南禁作此布帝素有熱病并患金創末年尤劇坐臥常須冷物後有人獻石牀寢之極以爲佳乃歎曰木牀且費而況石邪卽令毀之制諸主出適遣送

不過二十萬無錦繡金玉內外奉禁莫不節儉性尤簡  
易嘗著連齒木屐好出神武門內逍遙左右從者不過  
十餘人時徐羨之住西州嘗思羨之便步出西掖門羽  
儀絡驛追隨已出西明門矣諸子旦問起居入閣脫公  
服止著裙帽如家人之禮焉微時躬耕於丹徒及受命  
耨耜之具頗有存者皆命藏之以留於後及文帝幸舊  
宮見而問焉左右以實對文帝色慙有近侍進曰大舜  
躬耕歷山伯禹親事土木陛下不覩列聖之遺物何以  
知稼穡之艱難何以知先帝之至德乎及孝武大明中  
壞上所居陰室於其處起玉燭殿與羣臣觀之牀頭有

土障壁上挂葛燈籠麻繩拂侍中袁顓盛稱上儉素之德孝武不荅獨曰田舍公得此以爲過矣故能光有天  
下克成大業盛矣哉

少帝諱義符小字車兵武帝長子也母曰張夫人晉義  
熙二年生帝於京口時武帝年踰不惑尚未有男及帝  
生甚悅年十歲拜豫章公世子帝膂力絕人善騎射解  
音律宋臺建拜宋世子元熙元年進爲宋太子武帝受  
禪立爲皇太子永初三年五月癸亥武帝崩是日太子  
卽皇帝位大赦制服三年尊皇太后曰太皇太后六月  
壬申以尚書僕射傅亮爲中書監尚書令司空徐羨之

領軍將軍謝晦及亮輔政戊子太尉長沙王道憐薨秋  
九月丁未有司奏武皇帝配南郊武敬皇后配北郊冬  
十一月戊午有星孛于營室十二月庚戌魏軍剋滑臺  
景平元年春正月己亥朔大赦改元文武賜位二等辛  
丑祀南郊魏軍攻金墉城癸卯河南郡失守乙卯有星  
孛于東壁二月丁丑太皇太后崩鎮軍大將軍大且渠  
蒙遜河南鮮卑吐谷渾阿豺竝遣使朝貢庚辰進蒙遜  
驃騎大將軍封河西王以阿豺爲安西將軍沙州刺史  
封澆河公二月壬寅孝懿皇后祔葬于興寧陵是月高  
麗國遣使朝貢夏閏四月己未魏軍剋虎牢秋七月癸

酉尊所生張夫人爲皇太后丁丑赦五歲刑以下冬十月己未有星孛于氏是歲魏明元皇帝崩

二年春二月己卯朔日有蝕之廢南豫州刺史廬陵王義眞爲庶人徙新安郡乙巳大風天有雲五色占者以爲有兵執政使使者誅皇弟義眞于新安高麗國遣使朝貢時帝居處所爲多乖失夏五月己酉皇太后令暴帝過惡廢爲營陽王一依漢昌邑晉海西故事奉迎鎮西將軍宜都王義隆入纂皇統始徐羨之傅亮將廢帝諷王弘檀道濟求赴國計弘等來朝使中書舍人邢安泰潘盛爲內應是旦道濟謝晦領兵居前羨之等隨後

因東掖門開入自雲龍門盛等先戒宿衛莫有禦者時  
帝於華林園爲列肆親自酤賣又開瀆聚土以象破岡  
塙與左右引船唱呼以爲歡樂夕游天泉池卽龍舟而  
寢其朝未興兵士進殺二侍者於帝側傷帝指扶出東  
閣就收璽綬羣臣拜辭送于東宮遂幽于吳郡是日赦  
死罪以下太后令奉還璽綬檀道濟入守朝堂六月癸  
丑徐羨之等使中書舍人邢安泰弒帝於金昌亭帝有  
勇力不卽受制突走出昌門追以門關踣之致殞時年  
十九

論曰晉自社稷南遷王綱弛紊朝權國命遞歸台輔君



道雖存主威久謝桓溫雄才蓋世勳高一時移鼎之業  
已成天人之望將改自斯以後帝道彌昏道子開其禍  
端元顯成其釁末桓玄乘時藉運加以先資革命受終  
人無異望宋武地非齊晉衆無一旅曾不浹旬夷凶翦  
暴誅內清外功格上下若夫樂推所歸謳歌所集校之  
魏晉可謂收其實矣然武皇將涉知命弱嗣方育顧有  
慈顏前無嚴訓少帝體易染之質稟可下之姿外物莫  
犯其心所欲必從其志嶮縱非學而能危亡不期而集  
其至顛沛非不幸也悲哉

南史卷一考證

宋高祖紀裕字德輿○輿監本訛興今從宋書

昨見劉裕風骨不恒蓋人傑也○恒監本訛其今從南  
本改正

盼山川以增佇○盼監本訛盼今改正

桓立頗欲釐改竟不能行○行監本訛行今改正

毅至西稱疾篤表求從弟兗州刺史藩以爲副貳○監  
本脫稱字今從各本增入

封帝次子義真爲桂陽縣公○陽監本訛楊今改從宋  
書

辛卯復置五校三將官增殿中將軍員二十人○增監  
本訛贈今改正

是歲魏明元皇帝太常五年○太魏書作泰

二年春正月○二監本訛五今改正

少帝紀突走出昌門追以門關踏之○關監本訛開今  
改從宋書

南史卷二

唐

李

延

壽

撰

宋本紀中第二

太祖文皇帝諱義隆小字車兒武帝第三子也晉義熙三年生於京口十一年封彭城縣公永初元年封宜都郡王位鎮西將軍荊州刺史加都督時年十四長七尺五寸博涉經史善隸書是歲來朝會武帝當聽訟仍遣上訊建康獄囚辯斷稱旨武帝甚悅景平初有黑龍見西方五色雲隨之二年江陵城上有紫雲望氣者皆以爲帝王之符當在西方其年少帝廢百官議所立徐羨

之傅亮等以禎符所集備法駕奉迎入奉皇統行臺至江陵尚書令傅亮奉表進璽紱州府佐史並稱臣請題榜諸門一依宮省上皆不許教州府國紀綱宥所統內見刑是時司空徐羨之等新有弑害及鑿駕西迎人懷疑懼惟長史王曇首司馬王華南蠻校尉到彥之共期朝臣未有異志帝曰諸公受遺不容背貳且勞臣舊將內外充滿今兵力又足以制物夫何所疑甲戌乃發江陵命王華知州府留鎮陝西令到彥之監襄陽車駕在道有黑龍躍負上所乘舟左右莫不失色上謂王曇首曰此乃夏禹所以受天命我何德以堪之及至都羣臣

迎拜於新亭先謁初寧陵還次中堂百官奉璽紱沖讓未受勸請數四乃從之

元嘉元年秋八月丁酉皇帝卽位于中堂備法駕入宮御太極前殿大赦改元文武賜位二等戊戌拜太廟詔追復廬陵王先封奉迎靈柩辛丑謁臨川烈武王陵癸卯進司空徐羨之位司徒江州刺史王弘位司空尚書令傅亮左光祿大夫開府儀同三司甲辰追尊所生胡婕妤爲章皇太后封皇弟義恭爲江夏王義宣爲竟陵王義季爲衡陽王己酉減荆湘二州今年稅布之半九月丙子立妃袁氏爲皇后是歲魏太武皇帝始光元年

二年春正月丙寅司徒徐羨之尚書令傅亮奉表歸政  
上始親覽萬機辛未祀南郊大赦秋八月乙酉驃騎將  
軍南徐州刺史彭城王義康以本號開府儀同三司改  
授司空王弘車騎大將軍開府儀同三司冬十一月庚  
午以武都王世子楊玄爲北秦州刺史襲封武都王是  
歲赫連屈丐死

三年春正月丙寅司徒徐羨之尚書令傅亮有罪伏誅  
遣中領軍到彥之征北將軍檀道濟討荊州刺史謝晦  
上親率六師西征大赦丁卯以江州刺史王弘爲司徒  
錄尚書事二月戊午以金紫光祿大夫王敬弘爲尚書

左僕射豫章太守鄭鮮之爲右僕射戊辰到彥之檀道濟大破謝晦於隱磯丙子車駕自蕪湖反旆己卯禽晦於延頭送都伏誅夏五月乙未以征北將軍南兗州刺史檀道濟爲征南大將軍開府儀同三司江州刺史乙巳驃騎大將軍涼州牧大且渠蒙遜改爲車騎大將軍詔大使巡行四方觀省風俗丙午臨延賢堂聽訟自是每歲三訊秋旱且蝗冬十二月前吳郡太守徐佩之謀反伏誅

四年春正月乙亥朔曲赦建鄴百里內辛巳祀南郊二月乙卯行幸丹徒謁京陵三月丙子宴丹徒宮帝鄉父



老咸與焉蠲丹徒今年租布原五歲刑以下丁亥車駕  
還宮戊子尚書右僕射鄭鮮之卒壬寅採富陽令諸葛  
闡議禁斷夏至日五絲命縷之屬夏五月都下疾疫遣  
使存問給醫藥死無家屬者賜以棺器六月癸卯朔日  
有蝕之

五年春正月乙亥詔以陰陽愆序求讜言甲申臨玄武  
館閱武戊子都下大火遣使巡慰振恤夏六月庚戌司  
徒王弘降爲衛將軍開府儀同三司都下大水乙卯遣  
使檢行振贍十二月天竺國遣使朝貢是歲魏神龜元  
年大武皇帝伐赫連昌滅之乞伏熾盤死

六年春正月辛丑祀南郊癸丑以荊州刺史彭城王義康爲司徒錄尚書事三月丁巳立皇子劭爲皇太子戊午大赦賜文武位一等夏四月癸亥以尚書左僕射王敬弘爲尚書令丹陽尹臨川王義慶爲尚書左僕射吏部尚書江夷爲右僕射五月壬辰朔日有蝕之秋七月百濟國遣使朝貢冬十一月己丑朔日有蝕之星晝見十二月西河河南國並遣使朝貢

七年春二月壬戌雪且雷三月戊子遣左將軍到彥之侵魏夏六月己卯封氏楊難當爲武都王冬十月戊午立錢署鑄四銖錢戊寅魏剋金墉城十一月癸未又剋

武牢壬辰遣征南大將軍檀道濟拒魏右將軍到彥之自滑臺奔退十二月都下火延燒于太社北墻是歲馮跋死倭百濟呵羅單林邑呵羅他師子等國並遣使朝貢吳興晉陵義興大水遣使巡行振恤

八年春二月辛酉魏剋滑臺癸酉檀道濟引軍還自是河南復亡三月大雩夏六月己丑大赦旱故又大雩閏六月乙巳遣使省行獄訟簡息徭役

九年春二月辛卯詔曰故太傅長沙景王故大司馬臨川烈武王故司徒南康文宣公穆之衛將軍華容公弘征南大將軍永脩公道濟故左將軍龍陽侯鎮惡或履

道廣深執德沖邈或雅量高劭風鑒明遠或識準弘正  
才略開邁咸文德以弘帝載武功以隆景業而太常未  
銘從祀闕享寤寐屬慮永言興懷便宜配祭廟庭勒功  
天府三月庚戌進衛將軍王弘爲太保丁巳加江州刺  
史檀道濟爲司空夏五月壬申新除太保王弘薨六月  
癸未置積射彊弩將軍官乙未以征西將軍沙州刺史  
吐谷渾慕瓚爲征西大將軍西秦河二州刺史隴西王  
壬寅以撫軍將軍江夏王義恭爲征北將軍開府儀同  
三司南兖州刺史秋七月庚午以領軍將軍殷景仁爲  
尚書僕射冬十二月庚寅立皇子紹爲廬陵王奉孝獻

王祀江夏王義恭子朗爲南豐王奉營陽王祀是歲魏延和元年

十年春正月甲寅改封竟陵王義宣爲南譙王己未大赦夏林邑闍婆娑州訶羅單國並遣使朝貢秋七月戊戌曲赦益梁秦三州冬十一月氏楊難當據有梁州是月且渠蒙遜死

十一年夏四月梁秦二州刺史蕭思話破氏梁州平五月丁卯曲赦梁南秦二州劔閣以北戊寅以大且渠茂虔爲征西大將軍梁州刺史封西河王是歲林邑扶南訶羅單國並遣使朝貢

十二年春正月辛酉大赦辛未祀南郊癸酉封馮弘爲燕王夏四月丙辰詔內外舉士都下地震六月禁酒師子國遣使朝貢丹陽淮南吳吳興義興大水都下乘船己酉以徐豫南兗三州會稽宣城二郡米穀百萬斛賜五郡遭水人秋七月辛酉閻婆娑達扶南國並遣使朝貢八月乙亥原除遭水郡諸逋負九月蜀賊張尋爲寇是歲魏太延元年

十三年春正月癸丑朔上有疾不朝會三月己未誅司空江州刺史檀道濟庚申大赦夏六月高麗武都等國並遣使朝貢秋七月己未零陵王太妃殂追崇爲晉皇

后葬以晉禮九月癸丑立皇子濬爲始興王駿爲武陵王是歲馮弘奔高麗

十四年春正月辛卯祀南郊大赦戊戌鳳凰二見于都下衆鳥隨之改其地曰鳳凰里夏四月蜀賊張尋趙廣降遷之建鄴冬十二月辛酉初停賀雪河南西河訶羅單國並遣使朝貢

十五年春正月以平東將軍吐谷渾慕延爲鎮西將軍秦河二州刺史封隴西王秋七月辛未地震新作東宮是歲武都河南高麗倭扶南林邑等國並遣使朝貢立儒學館于北郊命雷次宗居之

十六年春正月戊寅閱武于北郊庚寅進彭城王義康  
爲大將軍領司徒以開府儀同三司江夏王義恭爲司  
空夏六月己酉改封隴西王吐谷渾慕延爲河南王秋  
八月庚子立皇子鑠爲南平王九月魏滅且渠茂虔冬  
十二月乙亥皇太子冠大赦是歲武都河南林邑高麗  
等國並遣使朝貢上好儒雅又命丹陽尹何尚之立立  
素學著作佐郎何承天立史學司徒參軍謝元立文學  
各聚門徒多就業者江左風俗於斯爲美後言政化稱  
元嘉焉

十七年夏四月戊午朔日有蝕之秋七月壬子皇后袁



氏崩八月徐兗青冀四州大水遣使振恤九月壬子葬  
袁皇后于長寧陵冬十月戊午前丹陽尹劉湛有罪伏  
誅大赦文武賜爵一級以大將軍領司徒錄尚書事彭  
城王義康爲江州刺史大將軍如故甲戌以司空江夏  
王義恭爲司徒錄尚書事十一月尚書僕射揚州刺史  
殷景仁卒十二月癸亥以光祿大夫王球爲尚書僕射  
戊辰武都河南百濟等國並遣使朝貢是歲魏太平真  
君元年

十八年春三月庚子雨雹戊申置尚書刪定郎官夏五  
月壬午衛將軍南兗州刺史臨川王義慶征北將軍南

徐州刺史南譙王義宣並開府儀同三司甲申河水汎  
溢害居人六月戊辰遣使巡行賑贍冬十一月戊子尚  
書僕射王球卒己亥以丹陽尹孟顛爲尚書僕射氏楊  
難當寇漢川十二月晉寧太守爨松子舉兵反寧州刺  
史徐循討平之是歲河南肅特高麗蘇摩黎林邑等國  
並遣使來朝貢

十九年夏四月甲戌上以久疾愈始奉初祠大赦五月  
庚寅梁秦二州刺史劉真道龍驤將軍裴方明破楊難  
當仇池平閏月都下水遣使巡行賑恤六月以大且渠  
無諱爲征西大將軍涼州刺史封西河王秋七月甲戌

晦日有蝕之九月丙辰有客星在北斗因爲慧入文昌  
貫五車埽畢拂天節經天苑季冬乃滅冬十二月丙申  
詔奉聖之屑速議承襲及令脩廟四時饗祀并命蠲近  
墓五家供酒埽栽松柏六百株是歲蠕蠕河南扶南婆  
皇國並遣使朝貢西涼武昭王孫李寶始歸于魏

二十年春正月辛亥祀南郊二月甲申閱武於白下魏  
軍剋仇池夏四月甲午立皇子誕爲廣陵王秋七月癸  
丑以楊文德爲征西將軍北秦州刺史封武都王冬十  
月雷十二月壬午置藉田是歲河西高麗百濟倭國並  
遣使朝貢自去歲至是諸州郡水旱傷稼人大饑遣使

開倉賑恤

二十一年春正月己亥南徐南兖南豫州揚州之浙江西並禁酒辛酉親耕藉田大赦二月己丑司徒錄尚書事江夏王義恭進位太尉領司徒辛卯立皇子宏爲建平王秋八月戊辰以荊州刺史衡陽王義季爲征北大將軍開府儀同三司南兖州刺史九月甲辰以大且渠安周爲征西將軍涼州刺史封河西王冬十月己亥命刺史郡守脩東耕丙子雷且電

二十二年春正月辛卯朔改用御史中丞何承天元嘉新歷二月甲戌立皇子禕爲東海王昶爲義陽王秋七

月己未以尚書僕射孟顛爲左僕射中護軍何尚之爲右僕射九月己未開酒禁癸酉宴于武帳堂上將行敕諸子且勿食至會所賜饌日盱食不至有飢色上誠之曰汝曹少長豐佚不見百姓艱難今使爾識有飢苦知以節儉期物冬十二月乙未太子詹事范曄謀反及黨與皆伏誅丁酉免大將軍彭城王義康爲庶人絕屬籍是冬浚淮起湖熟廢田千餘頃

二十三年夏四月丁未大赦六月癸未朔日有食之交州刺史檀和之伐林邑國剋之是歲大有年築北堤立立武湖於樂游苑北興景陽山于華林園役重人怨

二十四年春正月甲戌大赦賜文武位一等夏四月河  
濟俱清六月都下疫癘使巡省給醫藥以貨貴制大錢  
一當兩秋八月乙未徐州刺史衡陽王義季薨冬十一  
月甲寅立皇子渾爲汝陽王是歲徐兗青冀四州大水  
二十五年春閏二月己酉大蒐於宣武場三月庚辰校  
獵夏四月乙巳新作閭闔廣莫二門改先廣莫門曰承  
明開陽門曰津陽五月乙卯罷當兩大錢六月庚戌零  
陵王司馬元瑜薨丙寅加荊州刺史南譙王義宣位司  
空八月甲子立皇子彧爲淮陽王九月辛未以尚書右  
僕射何尚之爲左僕射冬青州城南遠望見地中如水

有影謂之地鏡

二十六年春正月辛巳祀南郊二月己亥幸丹徒謁京陵三月丁巳宴于丹徒宮大赦復丹徒縣僑舊今歲租布之半行所經過蠲田租之半癸亥使祭晉故司空忠肅公何無忌墓壬午至自丹徒丙戌婆皇國王辰婆達國並遣使朝貢冬十月庚子改封廣陵王誕爲隨郡王癸卯彗星見于太微甲辰以揚州刺史始興王濬爲征北將軍開府儀同三司徐兗二州刺史

二十七年春正月辛卯百濟國遣使朝貢二月魏軍攻縣瓠以軍興減百官奉祿三分之一三月乙丑淮南太

守諸葛闢求減奉祿同內百官於是諸州郡縣丞尉並  
悉同減戊寅罷國子學秋七月庚午遣寧朔將軍王玄  
謨拒魏太尉江夏王義恭出次彭城總統諸軍冬十一  
月丁未大赦十二月庚午魏太武帝率大衆至瓜步聲  
欲度江都下震懼成荷擔而立壬午內外戒嚴緣江六  
七百里舳舻相接始議北侵朝士多有不同至是帝登  
烽火樓極望不悅謂江湛曰北伐之計同議者少今日  
士庶勞怨不得無慙貽大夫之憂在予過矣甲申使饋  
百牢于魏

二十八年春正月丁亥魏太武帝自瓜步退歸倂廣陵



居人萬餘家以北徐豫青冀二兗六州殺略不可勝算  
所過州郡赤地無餘二月甲戌降太尉領司徒江夏王  
義恭爲驃騎將軍開府儀同三司壬午幸瓜步是日解  
嚴三月乙酉車駕還宮丙申拜初寧陵大旱夏四月癸  
酉婆達國遣使朝貢乙卯彗星見于昴是月都下疾疫  
使巡視給醫藥五月乙酉亡命司馬順則自號齊王據  
梁鄒城丁巳婆皇國戊戌河南國並遣使朝貢戊申以  
尚書左僕射何尚之爲尚書令太子詹事徐湛之爲左  
僕射護軍將軍壬子彗星見太微中對帝坐秋七月甲  
辰進安東將軍倭王綏濟爲安東大將軍八月癸酉梁

鄒平斬司馬順則是秋猛獸入郭內爲災冬十月癸亥  
高麗國遣使朝貢十一月壬寅曲赦二兗徐豫青冀六  
州徙彭城流人於瓜步淮西流人於姑熟合萬許家是  
歲魏正平元年

二十九年春正月甲午詔經寇六州仍逢災滂可量加  
赦贍二月乙卯雷且雪戊午立皇子休仁爲建安王三  
月壬午大風拔木都下火夏四月戊午訶羅單國遣使  
朝貢秋七月壬辰改封汝陰王渾爲武昌王淮陽王彧  
爲湘東王丁酉省大司農太子僕廷尉監官九月乙亥  
以平西將軍吐谷渾拾寅爲安西將軍秦河二州刺史

封河南王冬十一月壬寅揚州刺史廬陵王紹薨十二月戊辰黃霧四塞辛未以南兗州刺史江夏王義恭爲大將軍南徐州刺史錄尚書如故是歲魏中常侍宗愛構逆太武皇帝崩乃奉南安王余爲帝改元爲承平後又賊余於是殿中尚書長孫渴侯尚書陸麗奉皇孫是爲文成皇帝改元曰興安

三十年春正月乙亥朔會羣臣於太極前殿有青黑氣從東南來覆映宮上戊寅以司空荊州刺史南譙王義宣爲司徒中軍將軍揚州刺史壬午以南徐州刺史始興王濬爲衛將軍開府儀同三司荊州刺史戊子使江

州刺史武陵王駿統衆軍伐西陽蠻二月甲子元凶劼  
構逆帝崩于合殿時年四十七諡景皇帝廟號中宗三

月癸巳葬長寧陵孝武帝踐阼追改諡曰文帝廟號太  
祖帝聰明仁厚雅重文儒躬勤政事孜孜無怠加以在  
位日久惟簡靖爲心于時政平訟理朝野悅睦自江左  
之政所未有也又性存儉約不好奢侈車府令嘗以輦  
箠故請改易之又輦席舊以烏皮緣故欲代以紫皮上  
以竹箠未至於壞紫色貴並不聽改其率素如此云

世祖孝武皇帝諱駿字休龍小字道人文帝第三子也  
元嘉七年八月庚午夜生有光照室少機穎神明爽發

讀書七行俱下才藻甚美雄決愛武長於騎射十二年立爲武陵王二十二年累遷雍州刺史自晉江左以來襄陽未有皇子重鎮時文帝欲經略關河故有此授及魏太武大舉至淮南時帝鎮彭城魏使尚書李孝伯至帝遣長史張暢與語而帝改服觀之孝伯目帝不輟及出謂人曰張侯側有人風骨視瞻非常士也二十八年爲都督江州刺史時緣江蠻爲寇文帝遣太子步兵校尉沈慶之等伐之使上總統衆軍三十年正月出次西陽之五洲會元凶弒逆上率衆入討荊州刺史南譙王義宣雍州刺史臧質並舉義兵三月乙未建牙于軍門

是時多不悉舊儀有一翁斑白自稱少從武帝征伐頗  
悉其事因使指麾事畢忽失所在自冬至春常東北風  
連陰不霽其日牙立之後風轉而西南景色開霽有紫  
雲二蔭于牙上四月辛酉上次溧州丙寅次江寧丁卯  
大將軍江夏王義恭來奔奉表上尊號戊辰上至新亭  
己巳卽皇帝位大赦改文帝號諡以大將軍江夏王義  
恭爲太尉南徐州刺史庚午以荊州刺史南譙王義宣  
爲中書監丞相揚州刺史並錄尚書六條事以安東將  
軍隨王誕爲衛將軍荊州刺史加雍州刺史臧質車騎  
將軍並開府儀同三司以江州刺史撫軍將軍蕭思話

爲尚書左僕射壬申以征虜將軍王僧達爲右僕射改  
新亭爲中興亭夏五月乙亥輔國將軍朱脩之剋東府  
丙申剋建鄴二凶及同逆並伏誅庚辰詔分遣大使巡  
省方俗是日解嚴辛巳幸東府城甲申尊所生路淑媛  
爲皇太后乙酉立妃王氏爲皇后壬辰以太尉江夏王  
義恭爲太傅領大司馬甲午謁初寧陵曲赦建鄴二百  
里內并蠲今年租稅戊戌以撫軍將軍南平王鑠爲司  
空建平王宏爲尚書左僕射六月丙午車駕還宮初置  
殿門及上閣門屯兵庚午以丹陽尹褚湛之爲尚書右  
僕射庚申詔有司論功班賞各有差辛酉安西將軍西

秦河二州刺史吐谷渾拾寅進號鎮西大將軍開府儀  
同三司辛未改封南譙王義宣爲南郡王隨王誕爲竟  
陵王閏月丙子遣兼散騎常侍樂詢等十五人巡行風  
俗庚申加太傅江夏王義恭錄尚書事以荊州刺史竟  
陵王誕爲侍中驃騎大將軍開府儀同三司揚州刺史  
甲申蠲尋陽西陽郡租布三年是月置衛尉官秋七月  
辛丑朔日有蝕之辛酉詔崇儉約禁淫侈己巳司空南  
平王鐔薨以侍中南郡王世子恢爲尚書右僕射冬十  
月癸未聽訟於闕武堂十一月丙辰停臺省衆官朔望  
問記丙寅高麗國遣使朝貢十二月甲戌省都水使者



官置水衡令官癸未以將置東宮省太子率更令步兵  
翊軍校尉旅賁中郎將冗從僕射左右積弩將軍官中  
庶子中舍人庶子舍人洗馬各減舊員之半

孝建元年春正月己亥朔祀南郊大赦改元壬戌更鑄  
四銖錢丙寅立皇子子業爲皇太子賜天下爲父後者  
爵一級是月起正光殿二月庚子豫州刺史魯爽車騎  
將軍江州刺史臧質丞相荊州刺史南郡王義宣兖州  
刺史徐道寶舉兵反壬午曲赦豫州三月癸亥內外戒  
嚴夏五月甲寅義宣等攻梁山左衛將軍王玄謨大破  
之己未解嚴癸亥以吳興太守劉延孫爲尚書右僕射

六月戊辰臧質走至武昌爲人所斬傳首建鄴甲戌撫軍將軍柳元景進號撫軍大將軍及鎮北大將軍沈慶之並開府儀同三司癸未罷南蠻校尉官戊子省錄尚書官庚寅義宣於江陵賜死秋七月丙申朔日有蝕之既丙辰大赦賜文武爵一級冬十月戊寅詔開建仲尼廟制同諸侯之禮詳擇爽塏厚給祭秩十一月癸卯復置都水使者官始課南徐州僑人租是歲魏興光元年二年春二月己丑婆皇國遣使朝貢丙寅以南兖州刺史沈慶之爲左光祿大夫開府儀同三司夏四月壬申河南國遣使朝貢五月乙未熒惑入南斗戊戌以湘州

刺史劉遵考爲尚書右僕射六月甲子以國哀除釋大赦秋七月癸巳立皇弟休祐爲山陽王休茂爲海陵王休業爲鄱陽王己酉槃槃國遣使朝貢八月庚申雍州刺史武昌王渾有罪廢爲庶人自殺辛酉斤陀利國遣使朝貢三吳饑詔所在振貸九月丁亥閱武於宣武塲冬十月壬午以揚州刺史竟陵王誕爲司空南徐州刺史以尚書左僕射建平王宏爲尚書令十一月辛亥高麗國遣使朝貢是歲魏太安元年

三年春正月庚寅立皇弟休範爲順陽郡王休若爲巴陵郡王戊戌立皇王子尚爲西陽郡王辛丑祀南郊以

驃騎將軍建昌忠公到彥之衛將軍左光祿大夫新建  
文宣侯王華豫寧文侯王曇首配饗文帝廟庭壬子皇  
太子納妃甲寅大赦羣臣上禮二月丁丑制朔望臨西  
堂接羣下受奏事閏三月癸酉鄱陽王休業薨夏四月  
甲子初禁人車及酒肆器用銅五月辛酉制荆徐兗豫  
雍青冀七州統內家有馬一匹者蠲復一丁秋九月壬  
戌以丹陽尹劉遵考爲尚書左僕射冬十月丙午太傅  
江夏王義恭進位太宰領司徒

大明元年春正月辛亥朔大赦改元庚午都下雨水辛  
未遣使檢行賜以樵米三月壬戌制大臣加班劍者不

得入宮城門夏四月都下疾疫丙申遣使巡賜給醫藥  
死而無收斂者官爲斂埋五月吳興義興大水人飢乙  
卯遣使開倉振恤癸酉聽訟于華林園自是非巡狩軍  
役則車駕歲三臨訊丙寅芳春琴堂東西有雙橋連理  
景陽樓上層西南梁棋間有紫氣清暑殿西薨鴟尾中  
央生嘉禾一株五莖改景陽樓爲慶雲樓清暑殿爲嘉  
禾殿芳香琴堂爲連理堂乙亥以輔國將軍梁瑾葱爲  
河州刺史封宕昌王秋七月辛未土斷雍州諸僑郡縣  
九月建康秣陵二縣各置都官從事一人司水火劫盜  
冬十月甲辰以百濟王餘慶爲鎮東大將軍十二月丁

亥改封順陽王休範爲桂陽王

二年春正月辛亥祀南郊丙辰復郡縣田秩并九親祿  
奉壬戌拜初寧陵二月丙戌衛將軍尚書令建平王宏  
以本號開府儀同三司以丹陽尹褚湛之爲尚書左僕  
射三月丁未尚書令建平王宏薨乙卯以田農要月命  
太官停殺牛夏四月甲申立皇子子綬爲安陸王辛丑  
地震六月戊寅增置吏部尚書一人省五兵尚書官丁  
亥加左光祿大夫何尚之開府儀同三司秋八月丙戌  
中書令王僧達下獄死九月壬戌襄陽大水遣使巡行  
振恤庚午置武衛將軍武騎常侍官冬十二月己亥制

諸王及妃主席姓位從公者喪事聽設凶門餘悉斷是歲河南高麗林邑等國竝遣使朝貢

三年春正月己丑以領軍將軍柳元景爲尚書令二月乙卯以揚州所統六郡爲王畿以東揚州爲揚州甲子復置廷尉監官夏四月乙卯司空南兖州刺史竟陵王誕有罪貶爵誕不受命據廣陵反以沈慶之爲車騎大將軍開府儀同三司南兖州刺史討誕秋八月己巳剋廣陵城斬誕悉誅城內男丁以女口爲軍賞是日解嚴辛未大赦丙子以丹陽尹劉秀之爲尚書右僕射丙戌加南兖州刺史沈慶之位司空九月壬辰於玄武湖北

立上林苑甲午移南郊壇於牛頭山以正陽位冬十一月甲子立皇后蠶宮於西郊十二月辛酉置謁者僕射官是歲婆皇河西高麗肅慎等國各遣使朝貢西域獻儻馬

四年春正月辛未祀南郊甲戌宕昌國遣使朝貢乙亥親耕藉田大赦庚寅立皇子子勛爲晉安王子房爲尋陽王子頊爲歷陽王子鸞爲襄陽王三月甲申皇后親桑于西郊夏四月丙午詔四時供限詳減大半辛亥太宰江夏王義恭等表請封岱宗詔不從辛丑詔以都下疾疫遣使存問并給醫藥其亡者隨宜賑恤五月丙戌



尚書左僕射褚湛之卒秋七月甲戌光祿大夫開府儀  
同三司何尚之薨八月雍州大水甲寅遣加賑恤九月  
丁亥改封襄陽王子鸞爲新安王冬十月庚寅遣新除  
司空沈慶之討緣江蠻十一月戊辰改細作署令爲左  
右御府令丙戌復置大司農官十二月辛丑幸延尉寺  
宥繫囚魏遣使通和丁未幸建康縣原放獄囚倭國遣  
使朝貢是歲魏和平元年

五年春正月戊午朔華雪降散爲六出上悅以爲瑞二  
月癸巳閱武軍幢以下普加班錫冬所原宥三月甲戌  
行幸江乘遣祭故太保王弘光祿大夫王曇首墓夏四

月癸巳改封西陽王子尚爲豫章王丙申加尚書令柳元景左光祿大夫開府儀同三司丙午雍州刺史海陵王休茂殺司馬庾深之舉兵反參軍尹玄慶起義斬之傳首建鄴五月起明堂於國學南丙巳之地癸亥制帝室朞親官非祿官者月給錢十萬秋七月丁卯高麗國遣使朝貢庚午曲赦雍州八月戊子立皇子子仁爲永嘉王子真爲始安王巳丑詔以來歲脩葺庠序旌延國胄庚寅制方鎮所假白板郡縣年限依臺除食祿三分之一不給送故衛將軍東海王禕以本號開府儀同三司九月甲寅日有蝕之丁卯行幸琅邪郡原遣囚繫庚

午河濟清閩月丙申初立馳道自闔闔門至于朱雀門  
又自承明門至于玄武湖壬寅改封歷陽王子頊爲臨  
海王冬十月甲寅以南徐州刺史劉延孫爲尚書左僕  
射十二月壬申以領軍將軍劉遵考爲尚書右僕射甲  
戌制天下人戶歲輸布四疋

六年春正月辛卯祀南郊是日又宗祀文皇帝于明堂  
以配上帝大赦乙未置五官中郎將左右中郎將官二  
月乙卯復百官祿三月庚寅立皇子子元爲邵陵王壬  
寅以倭世子興爲安東將軍倭國王夏四月庚申新作  
大航門五月丙戌置凌室于覆舟山脩藏冰之禮六月

辛酉尚書左僕射劉延孫卒秋七月甲申地震有聲如雷兗州尤甚於是魯郡山搖者二乙未立皇子子雲爲晉陵王八月乙丑置清臺令官九月制沙門致敬人主乙未以尚書右僕射劉遵考爲左僕射以丹陽尹王僧朗爲右僕射冬十月丁卯詔上林苑內士庶丘墓欲還合葬者勿禁十一月己卯陳留王曹虔秀薨

七年春正月癸未詔尅日於立武湖大閱水師并巡江右講武校獵丁亥以右衛將軍顏師伯爲尚書左僕射二月甲寅車駕巡南豫南兗二州丁巳校獵烏江己未登烏江縣六合山壬戌大赦行幸所經無出今年租布

賜人爵一級女子百戶牛酒郡守邑宰及人夫從蒐者  
普加霑賚又詔蠲歷陽郡租輸三年遣使巡慰問人疾  
苦癸亥行幸尉氏觀溫泉壬申車駕至都拜二廟乃還  
宮夏四月甲子詔自今非臨軍戰陣一不得專殺其罪  
人重辟者皆依舊先上須報有司嚴加聽察犯者以殺  
人罪論五月丙子詔自今刺史守宰動人興軍皆須守  
詔施行惟邊隅外警及姦釁內發變起倉卒者不從此  
例六月戊申蠕蠕高麗等國並遣使朝貢秋七月乙亥  
進高麗王高璉位車騎大將軍開府儀同三司八月乙  
丑立皇子子孟爲淮南王子子產爲臨賀王車駕幸建康

秣陵縣訊獄囚九月庚寅以南徐州刺史新安王子鸞  
爲兼司徒乙未幸廷尉訊獄囚丙申立皇子子嗣爲東  
平王冬十月壬寅皇太子冠賜王公以下帛各有差戊  
申車駕巡南豫州奉太后以行癸丑行幸江寧縣訊縣  
囚加車騎將軍揚州刺史豫章王子尚開府儀同三司  
癸亥以開府儀同三司東海王禕爲司空加中軍將軍  
義陽王昶開府儀同三司己巳校獵於姑熟十一月丙  
子曲赦南豫州殊死以下巡幸所經詳減今歲田租乙  
酉詔祭晉大司馬桓溫征西將軍毛璩墓上於行所訊  
溧陽永世丹陽縣囚癸巳祀梁山大閱水師於中江有

白雀二集華蓋有司奏改元爲神雀詔不許乙未原放行獄徒繫浙江東諸郡大旱十二月壬寅遣使開倉賑恤聽受雜物當租丙午行幸歷陽甲寅大赦賜歷陽郡女子百戶牛酒蠲郡租十年己未加太宰江夏王義恭尚書令於博望梁山立雙闕癸未至自歷陽

八年春正月辛巳祀南郊是日還宗祀文帝于明堂甲戌詔曰東境去歲不稔宜廣商貨遠近販鬻米粟者可停道中雜稅其以仗自防悉勿禁夏閏五月壬寅以太宰江夏王義恭領太尉庚申帝崩於玉燭殿時年三十五七月丙午葬于丹陽秣陵縣巖山景寧陵帝末年爲

長夜之飲每旦寢興盥嗽畢仍復命飲俄頃數斗憑几  
昏睡若大醉者或外有奏事便肅然整容無復酒色外  
內服其神明莫敢弛惰

前廢帝諱子業小字法師孝武帝長子也元嘉二十六年正月甲申生孝武鎮尋陽帝留都下三十年孝武入  
伐元凶囚帝於侍中下省將加害者數矣卒得無恙及  
孝武踐阼立爲皇太子始末之東宮中庶子二率竝入  
直永福省大明二年出東宮七年加元服八年閏五月  
庚午孝武崩其日太子卽皇帝位大赦加驃騎大將軍  
柳元景尚書令甲子置錄尚書官以太宰江夏王義恭



錄尚書事加驃騎大將軍柳元景開府儀同三司秋七月庚戌婆皇國遣使朝貢崇皇太后爲太皇太后皇后日皇太后乙卯罷南北二馳道改孝建以來所變制度還依元嘉丙辰追崇獻妃爲獻皇后八月乙丑皇太后崩九月乙卯文穆皇后祔葬景寧陵冬十二月乙酉以尚書右僕射顏師伯爲尚書僕射壬辰以王畿諸郡爲揚州以揚州爲東揚州癸巳加車騎將軍揚州刺史豫章王子尚位司徒去歲及是歲東諸郡大旱甚者米一斗數百都下亦至百餘餓死者十六七孝建以來又立錢署鑄錢百姓因此盜鑄錢轉僞小商貨不行

景和元年春正月乙未朔大赦改元爲永光乙巳省諸州臺傳二月乙丑減州郡縣田祿之半庚寅鑄二銖錢夏五月魏文成皇帝崩秋八月庚午以尚書僕射顏師伯爲左僕射吏部尚書王景文爲右僕射癸酉帝自率宿衛兵誅太宰江夏王義恭尚書令柳元景左僕射顏師伯廷尉劉德願改元爲景和甲戌以司徒揚州刺史豫章王子尚領尚書令乙亥帝釋素服御錦衣以始興公沈慶之爲大尉庚辰以石頭城爲長樂宮東府城爲未央宮甲申以北邸爲建章宮南第爲長楊宮己丑復立南北二馳道九月癸巳幸湖熟奏鼓吹戊戌還宮帝

自以爲昔在東宮不爲孝武所愛及卽立將掘景寧陵  
太史言於帝不利而止乃縱糞於陵肆罵孝武帝爲虜  
奴又遣發殷貴嬪墓忿其爲孝武所寵初貴嬪薨武帝  
爲造新安寺乃遣壞之又欲誅諸遠近僧尼辛丑免南  
徐州刺史新安王子鸞爲庶人賜死丁未加衛將軍湘  
東王彧開府儀同三司己酉車駕討徐州刺史義陽王  
昶內外戒嚴昶奔魏戊午解嚴開百姓鑄錢冬十月癸  
亥曲赦徐州丁卯東陽太守王藻下獄死以文帝第十  
女新蔡公主爲貴嬪夫人改姓謝氏以武賁鉞戟鸞輅  
龍旂出警入蹕矯言公主薨空設喪事焉乙酉以豫州

刺史山陽王休祐爲鎮軍大將軍開府儀同三司十一月壬辰寧朔將軍何邁下獄死癸巳殺新除太尉沈慶之壬寅立皇后路氏四廂奏樂曲赦揚南徐二州丁未皇子生少府劉矇之子也大赦贓污淫盜悉皆原蕩賜爲父後者爵一級壬子以護軍將軍建安王休仁爲驃騎大將軍開府儀同三司戊午南平王敬猷廬陵王敬先安南侯敬深竝賜死時帝凶悖日甚誅殺相繼內外百官不保首領先是訛言湘中出天子帝將南巡荆湘以厭之期旦誅除四叔然後發引是夜湘東王或與左右阮佃夫王道隆李道兒密結帝左右壽寂之姜產之

等十一人謀共廢帝先是帝好遊華林園竹林堂使婦人裸身相逐有一婦人不從命斬之經少時夜夢游後堂有一女子罵曰帝悖虐不道明年不及熟矣帝怒於宮中求得似所夢者一人戮之其夕復夢所戮女罵曰汝枉殺我已訴上帝至是巫覡云此堂有鬼帝與山陰公主及六宮綵女數百人隨羣巫捕鬼屏除侍衛帝親自射之事畢將奏靡靡之聲壽寂之懷刀直入姜產之爲副諸姬迸逸廢帝亦走追及之大呼寂寂如此者三手不能舉乃崩於華光殿時年十七太皇太后令奉湘東王彧纂承皇統於是葬帝於丹陽秣陵縣南郊壇西

帝蝨目鳥喙長頸銳下幼而狷急在東宮每爲孝武所責孝武西巡帝啓參承起居書迹不謹上詰讓之曰書不長進此是一條耳聞汝比素業都懈狷戾日甚何以頑固乃爾初踐阼受璽紱傲然無哀容蔡興宗退而歎曰昔魯昭不戚叔孫請死國家之禍其在此乎帝始猶難諸大臣及戴法興等旣殺法興諸大臣莫不震懾於是又誅羣公元凱以下皆被毆捶牽曳內外危懼殿省騷然太后疾篤遣呼帝帝曰病人間多鬼可畏那可往太后怒語侍者曰將刀來破我腹那得生寧馨兒及太后崩後數日帝夢太后謂曰汝不仁不孝本無人君之

相子尚愚悖如此亦非運阼所及孝武險虐滅道怨結人鬼兒子雖多並無天命大命所歸應還文帝之子故帝聚諸叔都下慮在外爲患山陰公主淫恣過度謂帝曰妾與陛下雖男女有殊俱託體先帝陛下後宮數百妾惟駙馬一人事不均平一何至此帝乃爲立面首左右三十人進爵會稽郡長公主秩同郡王湯沐邑二千戶給鼓吹一部加班劍二十人帝每出公主與朝臣常共陪輦帝少好讀書頗識古事粗有交才自造孝武帝誅及雜篇章往往有辭采以魏武有發丘中郎將摸金校尉乃置此二官以建安王休仁山陽王休祐領之其

餘事迹分見諸列傳

論曰文帝幼年特秀自稟君德及正位南面歷年長久  
綱維備舉條禁明密罰有恒科爵無濫品故能內清外  
晏四海謐如而授將遣師事乖分闔才謝光武而遙制  
兵畧至於攻戰日時咸聽成旨雖覆帥喪旅將非韓白  
而延寇蹙境抑此之由及至言泄衾衽難結凶豎雖禍  
生非慮蓋亦有以而然夫盡人命以自養蓋惟桀紂之  
行觀夫大明之世其將盡人命乎雖周公之才之美亦  
當終之以亂由是言之得歿亦爲幸矣至如廢帝之事  
行著于篇假以中才之君有一於此足以致實況乎兼



斯衆惡不亡其可得乎

南史卷二考證

文帝紀冬十一月庚午以武都王世子楊玄爲北秦州刺史○南本無王字誤

是冬浚淮起湖熟廢田千餘頃○田監本訛四今改從南本

冬十月庚子改封廣陵王誕爲隨郡王○庚監本訛甲下文九月內有癸卯甲辰則誤可知矣今改從各本八月癸酉梁鄒平斬司馬順則○酉監本作亥今各本俱作酉故從之

淮陽王彧爲湘東王○彧監本訛或今改正

是爲文成皇帝改元曰興安○安監本誤元今改正  
孝武皇帝紀文帝第三子也○三監本訛二宋書文帝  
十九男元凶劬居長始興王濬第二孝武帝次之今  
改正

史臣論有一於此足以致實○足監本訛異今改從南  
本

南史卷三

唐

李

延

壽

撰

宋本紀下第三

太宗明皇帝諱彧字休景小字榮期文帝第十一子也元嘉十六年十月生二十五年封淮陽王二十九年改封湘東王孝武踐阼累遷鎮軍將軍雍州刺史是歲入朝時廢帝疑畏諸父以上付廷尉明日將加禍害上乃與腹心阮佃夫李道兒等密謀時廢帝左右直閤將軍宋越譚金童太一等是夜並外宿佃夫道兒因結壽寂之等十一月十九日弑廢帝於後堂建安王休仁便稱

臣奉引升西堂登御坐事出倉卒上失履跣猶著烏紗帽休仁呼主衣以白紗代之未卽位凡衆事悉稱令書已未司徒豫章王子尚山陰公主並賜死宋越譚金童太一伏誅十二月庚申朔令書以東海王禕爲中書監太尉以晉安王子勛爲車騎將軍開府儀同三司癸亥以建安王休仁爲司徒尚書令揚州刺史乙丑改封安陸王子綏爲江夏王

秦始元年卽大明九年也魏和平六年冬十二月丙寅皇帝卽位于太極前殿大赦改元辛未改封臨賀王子產爲南平王晉熙王子輿爲廬陵王壬申以王景文爲

尚書僕射乙亥追尊所生沈婕妤曰宣皇太后戊寅改  
太皇太后爲崇憲太后立皇后王氏罷二銖錢江州刺  
史晉安王子勛舉兵反鎮軍長史袁顛赴之鄧琬爲其  
謀主壬午謁太廟甲申郢州刺史安陸王子綬會稽太  
守尋陽王子房臨海王子頊並舉兵同逆

二年春正月乙未晉安王子勛僭卽僞位於尋陽年號  
義嘉壬辰徐州刺史薛安都舉兵反甲午內外戒嚴司  
徒建安王休仁都督諸軍南討丙戌徐州刺史申令孫  
司州刺史龐孟蚪豫州刺史殷琰青州刺史沈文秀冀  
州刺史崔道固湘州行事何慧文廣州刺史袁曇益州

刺史蕭惠開梁州刺史柳元怡並同逆丙午車駕親御  
六軍頓中興堂辛亥南豫州刺史山陽王休祐改爲豫  
州刺史西討吳郡太守顧琛吳興太守王曇生義興太  
守劉延熙晉陵太守袁標山陽太守程天祚並舉兵反  
鎮東將軍巴陵王休若統軍東討壬子崇憲皇太后崩  
二月乙丑以蔡興宗爲尚書右僕射壬申吳興太守張  
永右將軍蕭道成東討平晉陵丁亥建武將軍吳喜公  
率諸軍破賊於吳興會稽平定三郡同逆皆伏誅輔國  
將軍蕭道成前鋒北討輔國將軍劉劭前鋒西討劉胡  
衆四萬據赭圻三月庚寅撫軍將軍殷孝祖攻赭圻死

之以輔國將軍沈攸之代爲南討前鋒賊衆稍盛袁顛  
頓鵠尾連營至濃湖衆十餘萬丙申南徐州刺史桂陽  
王休範總統北討諸軍事戊戌貶尋陽王子房爵爲松  
滋縣侯癸卯令人入米七百石者除郡減此各有差壬  
子斷新錢專用古錢夏五月甲寅葬崇憲皇太后於脩  
寧陵秋七月丁酉以仇池太守楊僧嗣爲北秦州刺史  
封武都王八月己卯司徒建安王休仁率衆軍大破賊  
斬僞尚書僕射袁顛進討江郢荆湘雍五州平之晉安  
王子勛安陸王子綏臨海王子頊邵陵王子元並賜死  
同黨皆伏誅諸將帥封賞各有差九月癸巳六軍解嚴



戊戌以王玄謨爲左光祿大夫開府儀同三司領護軍  
將軍冬十月乙卯永嘉王子仁始安王子真淮南王子  
孟南平王子產廬陵王子興松滋侯子房並賜死丁卯  
以沈攸之爲中領軍與張永俱北討戊寅立皇子昱爲  
皇太子十一月壬辰立建平王景素子延年爲新安王  
十二月薛安都要引魏軍張永沈攸之大敗於是遂失  
淮北四州及豫州淮西地是歲魏大安元年

三年春正月庚子以農役將興詔太官停宰牛癸卯曲  
赦豫南豫二州閏正月庚午都下大雨雪遣使巡行振  
貸各有差二月甲申爲戰亡將士舉哀丙申曲赦青冀

二州夏四月丙戌詔以故丞相江夏文獻王故太尉巴東忠烈公柳元景故司空始興襄公沈慶之故征西將軍洮陽肅侯宗懋陪祭孝武廟庭庚子立桂陽王休範第三子德嗣爲廬陵王立侍中劉韜第三子銑爲南豐王以奉廬江昭王南豐哀王祀五月丙辰詔宣太后崇寧陵禁內墳瘞遷徙者給葬直蠲復其家壬戌以太子詹事袁粲爲尚書僕射秋八月壬寅以中領軍沈攸之行南兖州刺史率衆北伐九月戊午以皇后六宮以下雜衣千領金釵千枚賜北伐將士冬十月壬午改封新安王延年爲始平王辛丑以鎮西大將軍西秦河二州

刺史吐谷渾拾寅爲征西大將軍十一月立建安王休仁第二子伯猷爲江夏王是歲魏皇興元年

四年春正月丙辰朔雨草于宮乙亥零陵王司馬勛薨二月乙巳左光祿大夫開府儀同三司王玄謨薨三月交州人李長仁據州叛祆賊攻廣州殺刺史羊希龍驤將軍陳伯紹討平之夏四月丙申改封東海王禕爲廬江王山陽王休祐爲晉平王秋九月戊辰詔定黥刑之制有司奏自今凡劫竊執官仗拒戰邏司攻剽亭寺及傷害更人并監司將吏自爲劫皆不限人數悉依舊制斬刑若遇赦黥及兩頰劫字斷去兩脚筋徒付交梁寧

州五人以下止相逼奪者亦依黥作劫字斷去兩脚筋  
徙付遠州若遇赦原斷徒猶黥面依舊補冶士家口應  
及坐悉依舊詰謫及上崩其例乃寢庚午上備法駕幸  
東宮冬十月癸酉朔日有蝕之發諸州兵北伐

五年春正月癸亥親耕藉田乙丑魏剋青州執刺史沈  
文秀以歸二月丙申以廬江王禕爲車騎將軍開府儀  
同三司南豫州刺史夏六月辛未立晉平王休祐子宣  
曜爲南平王秋七月壬戌改輔國將軍爲輔師將軍九  
月甲寅立長沙王纂子延之爲始平王冬十月丁卯朔  
日有蝕之十一月丁未魏人來聘十二月庚申分荆益

之五郡置三巴校尉

六年春正月乙亥初制間二年一祭南郊間一年一祭明堂夏四月癸亥立皇子燮爲晉熙王六月癸卯以王景文爲尚書左僕射揚州刺史以袁粲爲右僕射己未改臨賀郡爲臨慶郡秋七月丙戌臨慶王智井薨九月戊寅立總明觀徵學士以克之置東觀祭酒訪舉各一人舉士二十人分爲儒道文史陰陽五部學言陰陽者遂無其人冬十月辛卯立皇子贊爲武陵王十二月癸巳以邊難未息制父母隔在異域者悉使婚宦

七年春正月甲戌置散騎奏舉郎二月癸丑征西將軍

荊州刺史巴陵王休若進號征西大將軍及征南大將軍江州刺史桂陽王休範竝開府儀同三司甲寅南徐州刺史晉平王休祐薨三月辛酉魏人來聘夏五月戊午鳩司徒建安王休仁庚午以袁粲爲尚書令褚彥回爲右僕射丙戌追免晉平王休祐爲庶人秋七月丁巳罷散騎奏舉郎乙丑江州刺史巴陵王休若賜死八月戊子以皇子躋繼江夏文獻王義恭庚寅帝疾間戊戌立皇子準爲安成王是歲魏孝文帝延興元年

泰豫元年春正月甲寅朔上以疾未痊故改元丁巳巨

人跡見西池冰上夏四月己亥上疾大漸加江州刺史

桂陽王休範位司空以劉劬爲尚書右僕射蔡興宗爲  
征西將軍開府儀同三司荊州刺史沈攸之進號安西  
將軍袁粲褚彥回劉劬蔡興宗沈攸之入閭被顧命是  
日上崩于景福殿時年三十四五月戊寅葬臨沂縣莫  
府山高寧陵帝好讀書愛文義在藩時撰江左以來文  
章志又續衛瓘所注論語二卷及卽大位舊臣才學之  
士多蒙引進末年好鬼神多忌諱言語文書有禍敗凶  
喪疑似之言應回避者犯卽加戮改駟馬字爲馬邊瓜  
以駟字似禍故也嘗以南苑借張永云且給三百年期  
盡更請宣陽門謂之白門上以白門不祥諱之尚書右

丞江謐嘗誤犯上變色曰白汝家門路太后停屍漆床  
移出東宮上幸宮見之怒免中庶子以之坐死者數十  
人內外常慮犯觸人不自保移床脩壁先祭土神使文  
士爲祝策如大祭饗阮佃夫楊運長王道隆皆擅威權  
言爲詔敕郡守令長一缺十除內外混然官以賄命王  
阮家富於公室中書舍人胡母顥專權奏無不可時人  
語曰禾絹閉眼諾胡母大張橐禾絹謂上也及秦始皇  
豫之際左右失旨往往有剗斫斷截禁中慄慄若踐刀  
劍夜夢豫章太守劉惛反遣就郡殺之軍旅不息府藏  
空虛內外百官並斷祿奉在朝造官者皆市井傭販之



子而又令小黃門於殿內埋錢以爲私藏以塞漬漚饒一食數升噉腊肉嘗至二百嚮奢費過度每所造制必爲正御三十副御次副又各三十須一物輒造九十枚天下騷然民不堪命宋氏之業自此衰矣

後廢帝諱昱字德融明帝長子也大明七年正月辛丑生於衛尉府帝母陳氏李道兒妾明帝納之故人呼帝爲李氏子帝亦自稱李將軍明帝諸子在孕皆以周易筮之卽以所得卦爲小字故帝小字慧震泰始二年立爲皇太子六年出東宮又制太子元正朝賀服袞冕九章衣明帝崩庚子太子卽皇帝位大赦尚書令袁粲護

軍將軍褚彥回共輔朝政班劍依舊入殿六月乙巳尊  
皇后曰皇太后立皇后江氏秋七月戊辰拜帝所生陳  
貴妃爲皇太妃八月戊午中書監左光祿大夫開府儀  
同三司蔡興宗薨冬十一月己亥新除郢州刺史劉彥  
節爲尚書左僕射

元徽元年春正月戊寅大赦改元詔自元年以前徒放  
者並聽還本土魏人來聘夏六月乙卯壽陽大水秋八  
月都下旱庚午陳留王曹銑薨九月丁亥立衡陽王嶷  
子伯玉爲南平王冬十二月癸亥朔日有蝕之乙巳進  
桂陽王休範位太尉癸亥立前建安王世子伯融爲始

安縣王

二年夏五月壬午江州刺史桂陽王休範舉兵反庚寅  
丙外戒嚴中領軍劉劭右衛將軍蕭道成前鋒南討出  
屯新亭征北將軍張永屯白下前南兖州刺史沈懷明  
戍石頭衛將軍袁粲中軍將軍褚彥回入衛殿省壬辰  
賊奄至攻新亭壘道成拒擊大破之越騎校尉張苟兒  
斬休範賊黨杜黑蠡丁文豪分軍向朱雀航劉劭拒賊  
敗績死之右將軍王道隆奔走遇害張永潰于白下沈  
懷明自石頭奔散甲午車騎典籤茅恬開東府納賊賊  
入屯中堂羽林監陳顯達擊大破之丙申張苟兒等又

破賊進平東府城梟禽羣賊丁酉大赦解嚴荊州刺史  
沈攸之南徐州刺史建平王景素郢州刺史晉熙王燮  
湘州刺史張興世並舉義兵赴建鄴六月癸卯晉熙王  
燮遣軍剋尋陽江州平壬戌改輔師將軍還爲輔國秋  
七月庚辰立皇弟友爲邵陵王乙酉徐州刺史建平王  
景素進號征北將軍開府儀同三司九月丁酉以袁粲  
爲中書監領司徒加護軍將軍褚彥回爲尚書令冬十  
一月丙戌帝加元服十二月癸亥立皇弟躋爲江夏王  
贊爲武陵王

三年春三月己巳都下大水夏六月魏人來聘秋七月

庚戌以袁粲爲尚書令九月丙辰征西大將軍河南王吐谷渾拾寅進號車騎征西大將軍

四年夏六月乙亥加蕭道成尚書左僕射秋七月戊子建平王景素據京城反己丑內外纂嚴遣驍騎將軍任農夫冠軍將軍黃回北討蕭道成總統衆軍始安王伯融都鄉侯伯猷並賜死乙未剋京城斬景素同逆皆伏誅八月丁卯立皇弟勰爲南陽王嵩爲新興王禧爲始建王九月戊子驍騎將軍高道慶有罪賜死己丑車騎將軍揚州刺史安成王準進號驃騎大將軍開府儀同三司冬十月辛酉以王僧虔爲尚書右僕射

五年夏四月甲戌豫州刺史阮佃夫步兵校尉申伯宗  
朱幼謀廢立皆伏誅五月地震六月甲戌誅司徒左長  
史沈勃散騎常侍杜幼文游擊將軍孫超之長水校尉  
杜叔文七月戊子夜帝遇弒於仁壽殿時年十五己丑  
皇太后令貶帝爲蒼梧郡王葬丹陽秣陵縣郊壇西初  
帝之生夕明帝夢人乘馬馬無頭及後足有人曰太子  
也及在東宮五六歲能緣漆帳竿去地丈餘如此者半  
食漸長喜怒乖節左右失旨者手加撲打徒跣蹲踞及  
嗣位內畏太后外憚大臣猶未得肆志自加元服三年  
好出入單將左右或十里二十里或入市里遇慢罵則

悅而受焉四年無日不出與左右解僧智張五兒桓夜  
出開承明門夕去晨反晨出暮歸從者並執鋌矛行人  
男女及犬馬牛驢逢無免者人間擾懼晝日不開門道  
無行人嘗著小袴不服衣冠有白梃數十各有名號鉗  
鑿錐鋸不離左右爲擊腦槌陰剖心之誅日有數十常  
見臥屍流血然後爲樂左右人見有嚔眉者帝令其正  
立以矛刺洞之曜靈殿上養驢數十頭所自乘馬養於  
御牀側與右衛翼輦營女子私通每從之遊持數千錢  
爲酒肉之費出逢婚姻葬送輒與挽車小兒羣聚飲酒  
以爲歡適阮佃夫腹心人張羊爲佃夫委信佃夫敗叛

走復捕得自於承明門以車轢殺之殺杜延載杜幼文  
躬運矛鋌手自斃割察孫超有蒜氣剖腹視之執楯馳  
馬自往刺杜叔文於玄武北湖孝武帝二十八子明帝  
殺其十六餘皆帝殺之吳興沈勃多寶貨往劫之揮刀  
獨前左右未至勃時居喪在廬帝望見之便投鋌不中  
勃知不免手搏帝耳唾罵之曰汝罪踰桀紂屠戮無日  
遂見害帝自斃割制露車一乘施笮乘以出入從數十  
人羽儀追之恒不相及又各慮禍亦不敢追但整部伍  
別在一處瞻望而已凡諸鄙事過目則能鍛銀裁衣作  
帽莫不精絕未嘗吹篪執管便韻天性好殺一日無事



輒慘慘不樂內外憂惶夕不及旦領軍將軍蕭道成與直閣將軍王敬則謀之七月戊子帝微行出北湖單馬先走羽儀不及左右張五兒馬墜湖帝怒自馳騎刺馬屠割之與左右作羌胡伎爲樂又於蠻岡賭跳因乘露車無復鹵簿往青園尼寺新安寺偷狗就曇度道人煮之飲酒楊玉夫常得意忽然見憎遇輒切齒曰明日當殺小子取肝肺是夜七夕令玉夫伺織女度報已因與內人穿針訖大醉臥於仁壽殿東阿氊幄中帝出入無禁王敬則先結玉夫陳奉伯楊萬年等合二十五人其夕玉夫候帝眠熟至乙夜與萬年同入氊幄內取千牛

刀殺之

順皇帝諱準字仲謨小字知觀明帝第三子也泰始五年七月癸丑生七年封安成王帝姿貌端華眉目如畫見者以爲神人廢帝卽位加揚州刺史元徽二年加都督揚南豫二州諸軍事四年進號驃騎大將軍及廢帝殞蕭道成奉太后令迎王入居朝堂

昇明元年秋七月壬辰皇帝卽位大赦改元徽五年爲昇明元年甲午蕭道成出鎮東城輔政荊州刺史沈攸之進號車騎大將軍蕭道成司空錄尚書事以袁粲爲中書監司徒以褚彥回爲衛將軍劉彥節爲尚書令加

中軍將軍辛丑以王僧虔爲尚書僕射癸卯車駕謁太廟八月癸亥司徒袁粲鎮石頭戊辰崇拜帝所生陳昭華爲皇太妃庚午以蕭道成爲驃騎大將軍開府儀同三司錄尚書如故九月己酉廬陵王暕薨十二月丁巳荊州刺史沈攸之舉兵不從執政丁卯蕭道成入守朝堂侍中蕭嶷鎮東府戊辰中外纂嚴壬申司徒袁粲據石頭謀誅道成不果旋見覆滅乙亥以王僧虔爲左僕射王延之爲右僕射吳郡太守劉遐據郡不從執政令張瓌攻斬之閏月辛亥屯騎校尉王宜興貳於執政見誅癸巳沈攸之攻郢城前軍長史柳世隆固守己亥中

外戒嚴假蕭道成黃鉞乙巳道成出頓新亭是歲魏太和元年

二年春正月丁卯沈攸之敗己巳華容縣人斬攸之首送之辛未雍州刺史張敬兒剋江陵荊州平丙子解嚴以柳世隆爲尚書右僕射蕭道成旋鎮東府二月庚辰以王僧虔爲尚書令王延之爲左僕射癸未蕭道成加授太尉以褚彥回爲中書監司空丙戌撫軍將軍揚州刺史晉熙王燮進號中軍將軍三月己酉朔日有蝕之夏四月南兖州刺史黃回貳于執政賜死五月戊午以倭國王武爲安東大將軍六月丁酉以輔國將軍楊文

弘爲北秦州刺史封武都王秋九月乙巳朔日有蝕之  
丙午加太尉蕭道成黃鉞都督中外諸軍事太傅領揚  
州牧賜殊禮以揚州刺史晉熙王燮爲司徒冬十月壬  
寅立皇后謝氏十一月立故武昌太守劉琨息頒爲南  
豐縣王癸亥誅臨澧侯劉晃甲子改封南陽王翽爲隨  
郡王十二月丙戌皇后見于太廟

三年春正月辛亥領軍將軍蕭贖加尚書右僕射進號  
中軍大將軍開府儀同三司二月丙子南豫州刺史邵  
陵王友薨丙申地震建陽門三月癸卯朔日有蝕之甲  
辰加蕭道成相國總百揆封十郡爲齊公備九錫之禮

庚戌誅臨川王綽夏四月壬申進齊公蕭道成爵爲王  
壬午安西將軍武陵王贊薨辛卯帝禪位於齊壬辰遜  
于東邸是日王敬則以兵陳于殿庭帝猶居內聞之逃  
于佛蓋下太后懼自帥闔豎索扶幸板輿黃門或促之  
帝怒抽刀投之中項而殞帝旣出宮人行哭俱遷備羽  
儀乘畫輪車出東掖門封帝爲汝陰王居丹徒宮齊兵  
衛之建元元年五月己未帝聞外有馳馬者懼亂作監  
人殺王而以疾赴齊人德之賞之以邑六月乙酉葬于  
遂寧陵謚曰順帝宋之王侯無少長皆幽死矣

論曰文帝負展南而實有人君之美經國之義雖弘而

隆家之道不足彭城照不窺古本無卓爾之資徒見昆  
弟之義深未識君臣之禮異以此家情行之國道主忌  
而猶犯恩離而未悟致以陵逼之愆遂成滅親之禍開  
端樹隙垂之後人明帝因猜忍之情據已行之典翦落  
洪支飲不待慮旣而本根莫庇幼主孤立下無磐石之  
託上有累卵之危方復藏璽懷紱魚服忘反危冠短制  
匹馬孤征以至覆亡理固然矣神器以勢弱傾移靈命  
隨樂推回改斯蓋履霜有漸夫豈一夕何止區區汝陰  
揖讓而已

南史卷三考證

明帝紀字休景○休景宋書作休炳南本作景休彼此互異

秋七月丙戌臨慶王智井薨○井監本訛并今從南本改正

後廢帝紀令玉夫伺織女度報已因與內人穿針訖○內監本誤鄉今從閣本



南史卷三考證